

傷寒緒論



傷寒緒論卷下

清

長洲石頭張

璐路玉父纂述

男

登誕先

參訂

倬飛疇

門人

鄒廉鐸鶴坡

較

日本

大泉長菴前田安宅子仁


再訂

男

典子守

發熱

發熱多屬表證。傷寒寒鬱肌表。則腠理閉密。故發熱。搏之烙手。當以脈之浮緊浮緩。證之無汗有汗。分風寒營衛施治。若汗不得出而煩躁者。營衛俱傷。陽邪內擾也。大青龍湯。若尺中無力者。此為本虛。小建中湯加減。凡服表藥三劑。



汗不出。熱不止者死。然有陽微不能作汗者。可用再造散或黃耆建中加附子。血虛加芎藭。始能作汗。此皆冬月發表藥也。若汗下後惡寒。脈弱。大便不結者。屬虛。宜溫補助陽爲主。○寒邪傳裏而變熱。則蒸蒸發熱。此卽本身中元氣爲寒所鬱。不得泄而化爲火也。若裏證具而表證未已者。大柴胡湯表證既罷而裏證已急者。三承氣湯選用。○三陰經寒證。太陰。少陰。厥陰。俱不發熱。惟少陰病有反發熱。脈沉者。此非傳經。乃直。少陰而仍兼太陽。故能發熱也。○春分以後。雖感寒邪。皆。五時暴寒。不必拘於傷寒例治。古人治感冒諸方。如芎藭。麻。桂。等。皆不分三陽經藥。以時屬少陽風木。不獨太陽寒也。○夏月汗府疎豁。偶感微寒發熱。必心包先受。消暑十。○秋涼發熱欬嗽。宜金沸草散。甚則小青龍湯。若交

霜降節後。卽屬正傷寒矣。其或冬時過暖。而病發熱。心煩
咽痛。或自利者。爲冬溫。陽且湯證也。凡春時發熱。頭疼。煩
渴飲水。爲伏氣發溫。春夏發熱。而脈大無力。爲夾內傷。
發熱而脈細小或虛。足脛逆冷。而陽縮入腹者。爲夾陰。發
熱脈沉小或短濇。而足冷陽縮。兼腹滿或痛。爲食鬱。雖夏月
不妨用薑桂。使溫暖之氣助其陽和。并食亦得消散。雖有表
證。慎不可純用表劑。升其虛陽。亦不可過用消導。引邪內犯。
○有食積發熱。則胸脇煩熱。熱則顛脹。復有瘀血發熱。則脇
下或少腹痛不可拊。又有陰虛發熱。必夜熱晨涼。若瘡瘍初
起發熱。必有痛處。並不可誤施汗劑。其脈陰陽俱虛。熱不
止。大汗後身愈熱。下利煩躁熱不止。汗下後大熱脈躁亂者。
皆不可治也。

孫兆治一道士發熱汗出驚眩身戰掉欲擗地有欲發汗者有欲作中風治者有欲以涼藥解之者孫曰此太陽經欲解腎氣虛不能作汗所以心悸目眩身戰與真武湯三服微汗而解

頭痛

昔人以頭痛專主太陽殊不知三陽經各有部分如大陽頭痛自腦後上至巔頂下有頂強腰脊痛之異以太陽經脈行身之後也當辨中風傷寒汗之汗後頭痛如破此轉屬陽明也風火相煽頭痛如破諸藥不効愈表愈痛痛連眉稜者選奇湯證也陽明頭痛上連目珠痛在額前兼鼻孔乾下有身熱不眠之分以陽明經脈行身之前也少陽頭痛上至兩角下有耳聾脇痛之殊以少陽經脈行身之側也

三時感冒。皆有頭痛。當從芎蘇香蘇輩選用。三陰經至頸而還。惟厥陰之脉上巔與督脉會。故有頭痛。上則巔頂收引。頭角。下有脉沉弦細手足厥冷。此爲在經。當歸四逆湯。若在裏則乾嘔吐涎沫頭痛。吳茱萸湯。太陽中濕。則上有鼻塞吐痰。下有腹滿自利。少陰中寒。上則入連腦齒。下則煩躁爪甲青。此真頭痛不治。陽明熱蒸頭痛。必小便黃赤而短數。調胃承氣湯。太陽脉沉。身熱頭痛爲夾陰。黃耆建中湯。若誤汗不差者。四逆湯溫之。太陽證下之。頭痛未除。脣寒面青。指頭微厥。復發熱者。爲表邪內陷於陰分。雖頭痛發熱。不可用表藥。宜竹葉石膏湯。冬溫發熱頭痛。心煩咽痛自利。陽且湯。溫病熱病時行疫癘。初起頭痛。皆不可用表藥。宜黃芩白虎加葱豉。或葛根葱白湯以治外。涼膈雙解達原。

承氣加葱豉薑棗。合內外而治之。裏氣一通。頭痛自愈。○內傷火炎。新產血虛。皆有頭痛。但時痛時止。而無腦後痛者。蓋火炎則痛自兩角。血虛則痛連魚尾。以其自內達外。故必行少陽部分。是以頭痛見兩角者。則有少陽風熱與虛火之別。若見額前者。亦有陽明與食積之殊。其見腦後者。必太陽外感無疑也。

頭重

濁陰寒濕之邪。上干清陽之位。故使頭重。○頭重惡寒。項強不能舉者。屬太陽。汗之則愈。○若陰陽易。頭重眼中生花者。逍遙湯下燒裊散。○若眩暈而頭重不能舉者。此雖夾痰。亦屬氣虛。導痰六君選用。

頭脹

頭脹者。氣虛火炎也。冬溫風溫。溫病熱病時行中喝中暑。多有頭重脹痛。皆是濕熱火氣內燔。慎不可用發散藥。如冬溫陽且湯。風溫萎蕤湯。溫病黃芩湯。熱病時行中喝。白虎湯。中暑清暑益氣湯。此皆傷寒家切務。其他濕熱痰飲食積。疰夏等。俱有頭重脹痛。乃屬雜證。此不復贅。

項強

太陽之脈。從頭下項。連風府。故項強爲太陽表證。然項強几几。如凍身縮頸。欲伸而不能自如者。此胃氣不得上升。乃邪將犯陽明之候。若汗出惡風者。桂枝加葛根湯。無汗惡風者。葛根湯。項強連脇下滿。身熱惡風。手足溫而渴者。爲邪干少陽。小柴胡湯。乃知項強多兼陽明少陽。不可執認太陽也。又結胸證。項強如柔痙狀。此裏實證。以背爲胸之府。背強

項亦強也。急下之。天行時氣發熱。至晚則腰脊痛。頭項強。身重。輕則涼膈。重則雙解。並加葱白香豉。寒濕項強發瘧。及過汗經虛。生風發瘧。與陰毒項強。治法詳總論中。

惡風

傷風惡風。見風則怯。密室之中則不惡也。蓋風爲陽邪。必傷衛氣。衛虛則腠理疎而自汗。汗去則脈浮緩也。是以桂枝湯專主自汗發熱惡風之證。然寒傷營。亦有惡風無汗而喘者。蓋惡寒則有陰陽之異。惡風悉屬於陽。故惡風未罷者。必當先解其外也。若發汗太過。衛虛亡陽。遂漏不止。惡風。桂枝加附子湯。風濕熱病。寒疫內傷惡風。詳總論中。

惡寒

傷寒惡寒。雖身居密室。猶自憎寒。拘急甚。則寒慄鼓頤。向火

不能遏其寒。非若寒熱之惡寒。熱至則不惡也。如已發熱。則身熱不欲去衣。由陰氣上入陽中。或陽微。或風虛相搏所致。惡寒一切屬表。雖裏證悉具。而微惡寒者。猶當解表。俟惡寒已。乃可攻裏。故先惡寒而發熱者。爲外惡寒。爲陽病。在陽宜發汗。然尺中遲弱者。慎不可汗。當用黃耆建中湯。若太陽證犯本。惡寒發熱未除。渴而小便不利者。五苓散。先服一半。探吐之。發汗後惡寒爲虛。芍藥甘草附子湯溫之。若下利惡寒手足溫者。陽邪內陷於太陰之經也。小建中湯。下證悉具而微惡寒。及下利惡寒。時時自煩者。爲陽邪內伏。並宜大柴胡湯。結胸證微惡寒者。必先用桂枝湯解表。然後用陷胸湯下之。若表不解而便攻之。表邪復結。其證必危。故結胸有一毫惡寒。不可下也。若初起惡寒。蹠臥脈沉者。爲內

惡寒爲陰病。在陰則宜溫。雖夏月亦須薑附。輕則理中。重則四逆。若當盛暑。須參大順。冷香漿水等治之。少陰病惡寒身蹇而利。手足厥冷。煩躁脈不至。及四逆惡寒。不煩而躁。皆死證也。經曰。發熱惡寒發於陽。無熱惡寒發於陰。尚何疑哉。溫熱時行惡寒。詳總論本例中。

石頑治玉峰陸去非繼室。嘉平患惡寒。周身骨節皆疼。飲食不入者已三日。而惡寒未止。全不發熱。診其六脈悉緊。而細詢之。平日起居飲食絕少。雖暑月不離複衣。知其素稟虛寒。而不能發熱。洵爲太陽寒傷營證無疑。但從來極虛感寒。無正發汗之理。乃以黃耆建中製生附汁於著內。以助衛氣。一服肢體卽溫。但背猶畏寒不止。更與補中益氣十全大補。並加熟附而安。

背惡寒

人身背爲陽。背惡寒者。陽虛之驗也。然陽氣內陷。亦有此證。是以背惡寒。有陰陽之異。若風寒在表。則一身盡寒矣。但背惡寒者。陰寒氣盛可知。以陰氣不能消耗津液。故少陰病二三日。口中和。背惡寒者。宜附子湯及灸氣海。熱病初起。口燥心煩。而背微惡寒者。此陽氣內伏於陰中。肌表之陽不勝邪。及陽明中暍。俱有是證。以陽邪內消津液。故煩渴引飲。並宜白虎加人參湯。若誤認陽虛而用溫藥。必致斑爛不救也。故曰口中渴。知其內有熱。口中和。知其內有寒。此理皎然矣。○勞役內傷。背惡寒者。必寒一陣。止一陣。爲陽虛內熱。東垣升陽散火湯。○又濕痰證。亦背惡寒。必肢體重痛。導痰湯加減。○若寒熱屢作。而背惡寒。脈來弦數。身有痛處者。爲發癰。

疽之候^上

寒熱

傷寒寒熱往來者。邪正分爭也。表邪欲入。而正氣拒格。陰陽相勝而作也。然寒熱往來與寒熱如瘧不同。如瘧則作止有時。往來則作止無時。有日二三發者。傷寒寒熱往來。雖專屬少陽經。亦有兼太陽陽明者。邪居表多則多寒。邪居裏多則多熱。然治法專用小柴胡湯。隨證加減。寒多增桂枝。熱多倍柴胡。加芍藥。寒多而脈虛。去芩加熟附。熱多而脈實。去參用大黃。凡少陽證。必先與小柴胡湯和之。服後不解。若其脈反浮者。當與柴胡桂枝湯。使其邪從表而散。若脈加數者。當與大柴胡湯。使其邪從裏而去也。○有元氣寡弱之人。素挾痰鬱。畧有動作勞傷。則憎寒發熱。有似傷寒。其脈弦數無力。

腋下及臂。或腿縫中有核腫痛者。謂之勞發。切勿汗下。宜補中益氣。加降火清痰藥。輕者周時微汗自解。

如瘧

如瘧者。作止有時。非若寒熱往來之無定也。病二三日。寒熱往來有時而作。脈浮洪者。此太陽似瘧也。若熱多寒少。尺脈遲為血少也。若日晡時作。汗出而煩。脈實者。此陽明似瘧也。陽明少陽合病。日晡寒熱如瘧者。大柴胡湯。若六七日發熱惡寒。舌不短。囊不縮。脈浮緩者。此厥陰似瘧也。為欲愈。小柴胡湯加桂枝。大率往來寒熱不離少陽。不拘日數多少。邪氣淺深。及婦人熱入血室。並宜小柴胡湯加減。太陽病八九日如瘧狀。一日二三度發。為欲愈。

潮熱

陽明旺於未申。故日晡潮熱。一日一發。如潮信然。傷寒邪入陽明胃府。爲邪熱內結。故可用承氣攻裏。凡欲攻裏。須病人脈實有力。再當審臍下有鞭滿結痛處。及問平昔有無動氣。量輕重施治。○發於寅卯者。屬少陽。發於巳午者。屬太陽。皆不可下。俟表證已。方可攻之。○潮熱而嘔。胸脇滿。盜汗出者。不可下。柴胡桂枝湯。○潮熱而跗下汗出爲膽實。大柴胡湯。手足心汗出者。爲胃實。大承氣湯。二處無汗。爲結未實。尚宜小柴胡和解。俟結定攻之。

無汗

風暑濕三者干人。皆衛氣受病。惟寒則營血受傷。腠理緻密。津液內滲。陽邪有餘。故身熱無汗而喘也。蓋邪氣在表。熏蒸腠理。則汗出。今邪不外蒸。必磚入裏。急用麻黃湯汗之。苦惡

風項強者。葛根湯。緣邪漸次入陽明經也。○陽明病無汗。小便不利。與膿者。必發黃。若渴欲飲水。小便不利無汗者。爲犯本。俱宜五苓散。有飲水內畜而無汗。桂枝去桂加茯苓白朮湯。○有脈遲無陽。不能作汗者。桂枝麻黃各半湯。○若溫熱病無汗。黃芩白虎三黃石膏選用。熱病發狂。有汗者生。無汗者死。○成無己言。三陰爲病。不得有汗。朱奉議亦云。三陰與陰陽易皆無汗。而仲景厥陰例中。大汗出。熱不忤。內拘急。四肢疼。下利厥逆而惡寒者。四逆湯主之。又陰毒則額上及手背冷。汗不止。爲亡陽將脫之兆。素問云。陰氣有餘。爲多汗。身寒。由是言之。則三陰不宜有汗。非三陰皆無汗也。

自汗

太陽中風。不由發表而汗泄。謂之自汗。以風傷衛則表虛不

能自固而汗。故用桂枝湯散邪以實衛也。然濕氣傷於脾。暑氣傷於心。皆令自汗。惟冬月寒傷營。則發熱無汗。若始本無汗。四五日後忽然自汗出。此寒邪傳裏而變熱。知邪已入府矣。凡傷風則惡風自汗。頭痛發熱。若裏證自汗。必煩躁惡熱。不惡風寒。迴手不侔也。又太陽經邪犯本。則汗出而渴。小便難。陽明經證。則頭目痛。眉稜骨疼。而自汗。陽明府證。則腹滿自汗。當詳審治之。有汗後惡寒。汗不止。爲表虛。黃耆建中湯。并用溫粉撲之。有汗多亡陽不止者。桂枝附子湯。小便少者。加茯苓。若陰證自汗。必身冷厥逆。經云。陰氣有餘。則多汗。身寒。四逆湯。甚則加人參。溫病誤服表藥。大汗出。煩渴不解。脈洪大者。白虎湯。若傷濕。則身重自汗。中暑則脈虛自汗。中喝則煩渴自汗。濕溫則妄言足冷自汗。風

溫則鼻鼾自汗。霍亂則吐利自汗。內傷勞倦則氣口虛大。身熱自汗。柔痙則搖擻自汗。治法各詳總論中。若發熱而利。大汗出。熱反盛。狂言不食。及汗出如油。喘而不休。汗出如珠。着身不流。柔汗發黃。環口黧黑者。皆不可治。

石頑治郭君升子。素孱弱。有失血證。五月間。患時行疫癘。壯熱昏憤。煩渴引飲。自汗如蒸。其脈時洪大時減小。或用發散和解之劑。躁熱轉劇。不得已懇治於余。用人參白虎調胃承氣。隨其脈之浮沉邪之出入。相間而施。凡兩汗三下。所下皆黃水。至第四次。用黃龍湯。始得結糞五六枚。周身大汗。熱除而痊。若礙其體虛。而怯於攻擊。則邪熱彌熾。元氣日燼。烏能保有今日乎。

盜汗

盜汗者。睡卽澌澌然汗出。覺則止而不復出矣。蓋邪居於衛而欲入。睡卽衛氣行於裏。乘表中陽氣不緞。津液得泄。故但睡而汗出。覺則氣散於表而汗止矣。故雜病盜汗。責於陰虛血熱。傷寒盜汗。責在半表半裏。爲膽有熱。故專用小柴胡湯。若脈浮緊。潮熱盜汗。柴胡桂枝湯。經云。微盜汗出。反惡寒者。表未解也。又陽明病。當作裏實。而脈微弦者。必盜汗出。又三陽合病。目合則汗。熱病白虎湯。傷寒小柴胡湯。溫病熱病得汗後。大熱除而盜汗出。及時疫下後盜汗不止。身有微熱。俱宜小柴胡去參半加橘皮。

頭汗

三陰之經。皆至頸胸中。獨三陽經上循於頭。故頭汗出身無汗。劑頸而還。乃陰陽不和。邪居表裏之間。故有是證。當以小

柴胡湯和之。然瘀血發黃水氣三證。亦有頭汗。當以證辨之。蓋瘀血頭汗。則小便自利。大便秘黑。發黃頭汗。則小便不利。發熱而渴。水氣頭汗。則胸滿喘欬。若半表半裏。則往來寒熱。亦有微惡寒。手足冷。脈沉者。○大抵頭汗雖主少陽。然屬陽明濕熱。不得發越者最多。至若額上汗出而腦後無汗者。定屬陽明無疑。○頭汗多有裏實證。故頭汗而脇下滿。大便秘者。大柴胡湯。頭汗識語者。調胃承氣湯。○若頭汗而心下懊懣者。爲虛煩。梔子豉湯。○下血而識語。頭上汗出。爲熱入血室。小柴胡去參加當歸。桃仁丹皮。○凡頭汗出不得小便者。不治。經云。關格不通。不得尿。頭無汗者。可治。有汗者死。○濕家誤汗。額上汗出而喘。小便利者。爲陽脫。經云。濕家汗之。額上汗出。小便利者死。下利不止者亦死。以陰陽上下

俱脫也。

孫兆治一人。頭汗手足冷。心下痞悶。大便秘。脈沉緊。或者見其四肢冷。又汗出煩悶。以爲陰結。孫曰。大便秘。非虛結也。安得爲陰。按少陰多有自利者。今脈雖沉緊。不得爲少陰證。此在半表半裏。投以小柴胡湯而愈。此一段正是仲景議論處。意謂四肢逆冷。脈沉緊。腹滿。全似少陰。然大便鞭。頭汗出。不得爲少陰。蓋頭者。三陽同聚。若三陰經則至胸而還。今有頭汗出。是似陽虛。故曰汗出爲陽微。若少陰額上冷汗。則爲陰毒矣。

手足腋股汗

手足汗出者。爲熱聚於胃。胃爲津液之府。以熱蘊於內。故津液滂達也。凡傷寒日晡潮熱。手足濇濇汗出者。爲胃實。若手

足心腋下。澹澹然汗出者。為兼少陽實熱也。大柴胡二承氣
選用。然亦有屬胃中寒者。經云。陽明病。不能食。小便不利。手
足澹澹然汗出者。此欲作固瘕。大便必初鞞後澹。此胃中虛
冷欲澹泄也。當知此汗必冷。宜用理中溫之。不可槩以為胃
熱也。

東垣治一人。脚膝痿弱。下尻臀皆冷。陰汗臊臭。精滑不固。
脈沉數有力。為火鬱於內。逼陰於外也。精氣不固者。髓中
混以濕熱也。以小柴胡去參。加茯苓。膽草。黃檗。苦寒瀉之
而愈。

煩熱

煩熱為鬱悶不安。火熱不得發越之象。不經汗吐下而煩熱
者。為太陽表證。經曰。病人煩熱汗出則解。如未作膈實。當和

解而已。若心下滿而煩，則有吐下之殊。煩熱自汗而渴，屬陽明。煩熱脈弦喜嘔，或煩而不嘔，屬少陽。不可不辨。汗下後六七日不大便，小腹滿而煩，或胸中痛而煩熱喘逆者，爲有燥屎。大承氣湯急下之。若四五日鼻乾目瞑，脈數而煩者，爲欲衄。黃芩湯加柴葛枳桔生地山梔清解之。凡傷寒六七日，手足三部脈皆至，大煩而口噤不能言，其人躁擾者，爲欲作汗解。差後虛煩不得眠，竹葉石膏湯。差後得食而煩，損穀則愈。有內傷勞役，陰火動而時煩時靜，不可誤認外感而施汗下也。凡服藥後煩悶不安，頭面髮際遍身發癢者，謂之藥煩。此胃虛不能勝藥力也。與熱薑湯徐徐呷之。藥中宜加用生薑以行胃氣自安。

煩躁

煩熱悉屬三陽。煩躁則有陰陽之異。蓋心熱則煩。腎熱則躁。煩者心胸愠怒。如有所觸。外不形現。為熱尚輕。躁乃手足動掉。若無所措。內外不寧。為熱最劇。有太陽表證。發熱頭痛惡寒。不汗出而煩躁者。大青龍湯。有太陽裏證。渴欲飲水而煩躁及無熱。但狂言煩躁者。並宜五苓散。有表證罷。而不大便煩躁者。此陽明府實。三承氣選用。有汗下不解。而煩躁惡寒者。此為虛寒。茯苓四逆湯。有脈數心煩而躁。至夜不寧者。為血虛。芍藥甘草湯。有晝日煩躁。至夜安靜者。為陽虛。乾薑附子湯。有誤用薑附而煩躁。虛則升陽散火。實則黃連解毒。若躁極脈亂者。勿治也。有少陰病。吐利手足厥冷。煩躁欲死者。吳茱萸湯。有陰盛格陽。脈沉細而疾。渴欲飲水。躁極悶亂者。此水極似火也。用礮震散。并以火熨。

之進熱藥而躁反甚。此藥力未到，不可遽用寒涼，使陽氣益消，則死。宜再與熱藥協濟之。有溫病熱病時疫溫疫，表裏俱邪，三焦大熱，煩躁大渴者，白虎解毒涼膈，雙解承氣，三黃石膏選用。有少陰病六七日無大熱，或厥逆自利不得汗，脈沉數而煩躁者，黃連阿膠湯。凡不經汗下而煩躁者，爲實。汗下後煩躁爲虛。結胸證悉具而煩躁發熱，下利厥逆而躁不得眠，少陰吐利躁煩，四肢惡寒，身踈脈不至，不煩而躁者，皆死證也。

節菴治一壯年，夏間勞役後食冷物，夜卧遺精，遂發熱痞悶，至晚頭額時痛，兩足不溫，醫不知頭痛爲火熱上乘，足冷爲脾氣不下，誤認外感夾陰，而與五積汗之，則煩躁口乾，目赤便秘，明日便與承氣下之，但有黃水，身強如瘥，煩

躁轉劇。腹脹喘急。舌胎黃黑。已六七日矣。診其脉六七至而弦勁急。以黃龍湯下黑物甚多。下後腹脹頓寬。躁熱頓減。但夜間仍熱。舌胎未盡。更與解毒湯合生脉散加地黃。二劑熱除。平調月餘而安。

戈存橘治一人。大熱八九日。已經汗下而熱不退。煩躁目赤。拘急沉重。六脉洪盛。曰此熱在三焦。閉塞經絡。津液營衛不通也。以三黃石膏加辰砂末。連進三服而愈。

喻嘉言治一人。傷寒六七日。身熱目赤。索水至前而不能飲。異常大躁。門牖洞啓。身卧地上。展轉不安。更欲入井。醫欲以承氣與之。診其脉洪大無倫。重按無力。此陽欲外脫。外顯假熱。內有真寒。敢以純陰之藥。重劫其陽乎。觀其得水不欲嚥。情已大露。而反可嚥。大黃芒硝乎。天地燠蒸。必

有大雨。此證傾刻一身大汗。不可救矣。於是以大劑人參
薑附甘草煎成冷服。服後寒戰戛齒有聲。陽微之狀始著。
以重綿和頭覆之。更與一劑。微汗熱退而安。

懊懣

傷寒表證誤下。正氣內虛。陽邪內陷。結於心胸之間。鬱悶不
舒。輕則虛煩懊懣。重則痞滿結胸矣。邪在膈上則宜吐。熱結
胃府即宜下。不可拘也。發汗吐下後。虛煩不得眠。劇者必
反覆顛倒。心中懊懣。與陽明病下之。其外有熱。手足溫而不
結胸。心中懊懣。及舌上胎滑。飢不能食。頭汗出而懊懣。三者
皆邪熱鬱於胸中。並宜梔子豉湯吐之。下之後。心中懊懣
而煩。為有燥屎。下後短氣煩躁。膈中拒痛。心中懊懣者。為
結胸。陽明病。身熱無汗。口燥渴。大小便不利。心中懊懣。此

爲濕熱必發黃。溫熱病懊憹。爲熱毒蘊於膈上。涼膈解毒
選用。口燥呻吟錯語不得眠。五苓散合黃連解毒湯。

江應宿治傷寒十餘日。身熱無汗。怫鬱不得卧。非躁非煩。
非寒非痛。時發一聲。如歎息之狀。乃懊憹怫鬱證也。投以
梔子豉湯吐之。治其懊憹。再以大柴胡下之。治其怫鬱而
安。

身體痛

傷寒身疼脉浮。則爲太陽表證。以寒氣襲於經絡之間。故惡
寒無汗。而骨節煩疼也。必用麻黃湯辛熱發表。令氣血流通
而愈。若自汗脉浮緩者。則腠理開泄。雖發熱而身體骨節不
疼矣。若傷寒身疼。而見尺脉遲弱者。此爲氣血本虛。不可驟
表。當先用黃耆建中溫之。然後發表可也。有汗後身疼脉

遲者。此陽氣虛也。新加湯。有發汗吐下後。身疼不休。表證不
解者。仲景必與桂枝湯。以汗吐下後。津液內耗。雖有表邪。
止宜桂枝調和營衛。不可復用麻黃也。有太陽表證具而
身疼頭痛。脈不浮而沉遲無力者。此真陽內虛。不能勝任麻
黃。當與四逆湯溫之。有裏證身疼者。乃直中裏證。非傳經
裏證也。若傳經裏證。則屬熱。熱主血行。又何有身痛哉。然直
中身疼者。寒氣直入於裏。陽已內衰。不能外通。而氣血凝滯。
故令體痛。宜急溫之。凡有頭痛發熱而身疼如縛者。表證也。
無頭痛發熱而身疼如杖者。直中也。有少陰病。脈沉手足
寒。身體痛。骨節疼。口中和。背惡寒者。附子湯。有少陰下利
清穀而身疼痛。急當救裏。然後治表。有陰毒身痛如被杖
者。有瘀血一身盡痛。而發熱面黃者。有中濕聲重鼻塞。一身

盡重而痛者。有風濕一身盡痛。惡風不欲去衣。汗出小便難者。有內傷勞倦。脉虛倦怠。而肢體煩疼者。各詳總論本例中。石頑治梁谿吳公益。患傷寒發熱頭痛。先曾服過發散之劑。而致面赤戴陽。四肢逆冷。周身骨節大痛。臍腰與小腹相引急痛。莖縮入腹。囊冷如冰。飲食不入。時時煩躁而渴。勢已瀕危。諸醫令具後事矣。余診之。脉雖洪大鼓指。而按之漸小無力。曰。此真元內虧。陰火不歸。而遊散在上在外也。遂與四逆加參著下黑錫丹。二劑上熱頓除。下體漸溫。惟周身痛楚不減。繼與大建中人参養榮調理而痊。

拘急

四肢爲諸陽之本。寒邪客於經絡之中。故使拘急不和也。有因發汗亡陽。津血內竭。不能榮養筋脉。而屈伸不便者。有陽

氣內衰不能行於四末而拘急疼痛者。大抵有發熱頭痛骨節疼而四肢拘急為表證。無身熱頭疼而蹠卧不伸四肢拘急者為陰證。若汗下後筋惕肉瞤而見拘急不仁者則為氣血虛弱也。脉浮自汗出小便數心煩微惡寒脚攣急不可與桂枝湯。當與黃耆建中湯。發汗後惡風小便難四肢拘急者桂枝加附子湯。吐利後汗出發熱惡風拘急厥逆及直中陰經厥逆拘急並宜四逆湯。

心下滿

心下滿者謂正當心下鞭滿乃病在氣分邪將入裏而未入也。若下早表邪入裏而滿者則為痞也。凡心下滿以手按之散而濡者此虛氣也。若按之汨汨有聲而軟者有停飲也。若按之鞭痛者有宿食也。若按之痛而其人善忘者有畜血

也。治法各具本條。○陽明證。心下鞅滿者。不可下。以邪在氣分也。下之利不止者死。利止者愈。又曰。脉浮而大。心下反鞅。有熱屬藏者。攻之。此燥屎逆上攻脾也。調胃承氣湯。

胸脇滿痛

胸脇滿者。爲胸脇下氣塞滿悶。非心下滿也。邪氣自表傳裏。必先胸膈。次傳脇下。而入胃府。是以胸滿多帶表證。脇滿當半裏也。○太陽陽明合病。喘而胸滿者。麻黃湯。則知胸滿屬表。而須發汗也。○又太陽病下後。脉促胸滿者。桂枝去芍藥湯。以病在衛氣。芍藥入營。故去之。○太陽病不解。傳入少陽。脇下鞅滿。嘔不能食。往來寒熱。脉雖沉緊。只宜小柴胡和解之。若舌上有白胎。雖不大便。不可下。本方去參加橘皮。○傷寒七八日。下之胸滿驚煩。此邪氣乘虛而入少陽之本也。柴

胡加龍骨牡蠣湯。大抵胸脇滿爲邪初入裏。氣鬱不行之候。只宜柴胡枳桔和之。若邪氣留於胸中爲實。則宜吐也。經曰。病在胸中當吐之。若發熱欬嗽胸滿而兩脇痛如挫者。此邪熱挾濕痰攻注也。小柴胡去參半加枳殼枳梗栝蒌杏仁白芥子竹瀝薑汁。若心下滿其人曾閃挫大便黑而脇下刺痛者。此有瘀血也。桃核承氣加枳桔柴胡不應加生附子。脇下偏痛發熱其脈緊弦此寒也。以溫藥下之。大黃附子湯。

痞

痞者痞窒不通之謂。以下之太早。虛邪內入而爲痞。故胸中但滿而按之不痛也。有表證未解者。又當柴胡桂枝等解散。然後用瀉心等劑。有汗解後心下痞鞭。腹中雷鳴下利者。

此胃中不和也。生薑瀉心湯。有太陽病誤下而痞者。此胃
虛客邪上逆也。甘草瀉心湯。有少陽病誤下。心下但滿而
不痛者。此痰濕上逆也。半夏瀉心湯。有心下痞。按之濡。關
上脉浮者。此熱邪上盛也。大黃黃連瀉心湯。有心下痞而
復惡寒者。此上有濕熱。下有陳寒。冷熱偏勝也。附子瀉心湯。
大下後復發汗。心下痞惡寒者。表未解也。先用桂枝湯解
表。後用大黃黃連瀉心湯攻痞。本以下之。故心下痞。與瀉
心湯痞不解。其人渴而躁煩。小便不利者。五苓散。有心下
痞滿。引脇下痛。乾嘔短氣。汗出不惡寒者。此脇下有水氣也。
十棗湯。有外證未除。而數下之。利不止。心下痞。表裏不
解者。此協熱利痞也。桂枝人參湯。傷寒吐下不解。心下痞
鞭。噫氣不除者。旋復代赭石湯。傷寒發熱。汗出不解。心下

痞悶。嘔吐而下利者。大柴胡湯。大抵胸脇痞結。未經攻下而成者。此或痰或食或氣凝滯而然。只須小柴胡加枳桔以開豁之。曾經下後。此為外邪陷入而為痞結。方可用陷胸瀉心等劑以疎導之。今醫不分曾下未下。見有心下脹滿。便呼結胸。輒與攻下之藥。乃成真痞結也。

結胸

傷寒表證誤下。實邪內陷。則為結胸。故當胸鞞滿而痛也。凡結胸證。心下鞞滿短氣。煩躁喘滿。心中懊憹。或項強如柔瘕狀。或胸中高起。或腹內拒痛。或舌上燥渴。或日晡小有潮熱。或從心下至小腹鞞滿。脈寸浮關沉為大結胸。大陷胸證也。凡用陷胸湯宜加陳倉米一撮。以曾經誤下。胃先受傷。用以護持中氣最妙。若氣弱脈沉遲。不可攻者。理中圓類與之。

世則少加附子。心下滿而按之方痛。脈浮滑者爲小結胸。
小陷胸湯。若心下結痛而無熱證。不渴不煩。此寒實結胸
也。甘草乾薑湯。未効枳實理中湯。實入三物白散。心下怔
忡。頭汗出無大熱者。爲水結胸。輕則半夏茯苓湯。重則大陷
胸加乾薑。心下滿而微鞭不可按。其人善忘。小便反利而
不得者。此血結也。桃核承氣湯。心下石鞭。胸前大熱而脹
滿結痛。飽悶氣急者。此食結也。或已下或未下。並宜調中飲。
虛者可用枳實理中。胸中滿結。脈浮大者不可下。下之則
死。此邪猶在表也。先與桂枝湯解表。俟表證已。然後攻之。
若未經下者。非結胸也。雖有胸脇痞滿。只宜小柴胡加枳桔。
或加桂枝和解之。誤下之。初覺結胸證見。急宜理中湯服。
此湯便可解散。如未解。候日足再下之。凡結胸有兼發黃。

發斑發狂發呃發噦者最劇。結胸證具而煩躁者死。結胸二三下之不退者死。喘急直視昏憤厥逆手足冷。或下出稀水糞者皆不可治。大抵結胸之脈沉緊滑實者乃可攻之。若沉微細小者決難救矣。

藏結

病如結胸狀。飲食如故。時時下利寸脈浮。關上小細沉緊。而無陽證。不往來寒熱。其人反靜。舌白胎滑者。藏結也。盧子孫言。藏結舌上胎白滑。滑者純陰之極。不可攻也。蓋舌乃心之苗。紅赤是正色。胎白而滑。如物入水中。色剝而白也。按藏結一證。昔人以仲景言舌上白胎滑者難治。又謂不可攻。復云此名藏結死。遂至置而不講。殊不知仲景所謂舌白胎滑者。以其仍有熱邪內結。所以生胎。若無邪結。則胎不生矣。只因

裏氣素虛。不能蒸熱。故無陽證發見。舌胎亦不得乾燥。以其
本虛邪結。故為難治。非真不治也。謂不可攻者。以其飲食如
故。知邪不在胃也。時時自利。其腸中亦無留結也。邪既不結
於腸胃。攻之無益。徒伐元氣耳。至於素有痞積。又加邪結。新
舊兩邪相搏。不解。故死。雖然。未可槩為死證。而委之不救也。
喻嘉言曾舉黃連湯。余嘗用連理湯治之。亦有能食自利。腹
脹急者。用備急丸。有腹痛引脇下不可按者。用附子瀉心湯。
有素有痞積。痛引陰筋者。用四逆湯加薑桂等。往往獲効。貴
在臨證活法耳。

腹滿

陽邪傳入太陰。則腹滿。凡人胃氣調和。則營氣從中焦上蒸
於肺。脾氣不運。則營氣不能上蒸。或從鬱火而滯於左脇。或

協痰濕而凝於右脇。或隨糟粕而滯於小腹。故脾氣衰憊之
人。腹脇常鞭滿也。凡腹脹滿而漫腫虛大者。屬氣滯。腫鞭光
亮者。爲水結。少腹濡腫而痛。有青紫筋膜絆於腹皮者。爲瘀
積也。腹滿不減。按之痛者爲實。承氣湯下之。腹滿時減。
按之不痛爲虛。理中湯溫之。病人自言腹滿。他人按之不
滿。此屬陰證。切不可攻。攻之必死。四逆湯溫之。氣口脈微
弦。必當腹滿。不滿必便難。兩胫疼痛。此爲虛寒。從下上也。當
溫之。金匱大建中湯。陽明病發熱。腹滿微喘。口燥不大便。
或讞語者。大柴胡湯。少陰病咽乾。腹滿。六七日不大便。或
下利。純清水。爲陽熱亢極。急下之。大承氣湯。病腹滿發熱
十餘日。脈浮數。飲食如故。此風熱內陷也。厚朴七物湯。腹
中寒氣。雷鳴切痛。胸脇逆滿嘔吐。附子粳米湯。汗後腹滿。

當溫之。厚朴生薑半夏甘草人參湯。吐後腹滿宜下之。調
承氣湯。下後腹滿宜吐之。枳子厚朴湯。腹滿身重面
黃遺尿。白虎湯。大抵陽熱爲邪。則腹滿而咽乾。陰寒爲邪。
則腹滿而吐利。食不下。若曾經汗吐下後腹滿者。治各不同
也。

腹痛

胸痛屬表邪內陷。脇痛屬半表半裏證。若腹痛則純屬於裏。
但有傳經直中之殊。蓋陽邪傳裏。與正氣相搏而痛。其痛不
常而滿腹攻攪。此猶帶表邪。當以小建中和之。因誤下陽邪
陷入太陰而痛。虛則桂枝加芍藥。實則桂枝加大黃。陰寒
在內而痛者。則痛從臍下注少腹。綿綿無休止時。欲作利也。
當以四逆輩溫之。有燥屎宿食而痛者。則煩躁不大便。腹

滿鞭痛是也。當以三承氣攻之。下之太過而痛者。則時劇時輕。却喜溫按。當用理中金匱大建中溫補之。少陰病腹痛四逆。或欬或悸。或小便不利。或泄利下重。四逆散清解之。胃中寒熱不和。腹中痛欲嘔吐者。黃連湯和之。中脘痛者。屬太陰。當臍痛者。屬少陰。少腹痛者。屬厥陰。經曰。諸痛爲實。下之則痛隨利減。此言陽邪傳裏而痛也。又腹爲陰。寒邪入內。必先腹痛下利。此言陰寒內結而痛也。凡腹痛喜得溫按而痛無休息者。爲直中陰寒。若時痛時止而喜按揉者。爲傳經壞證。皆宜溫之。痛不可近而鞭滿者。爲實結。痛不可近而濡軟者。爲蓄血。皆當下之。此陰陽虛實血氣之大端也。

小腹滿痛

小腹滿痛。皆爲裏證。與胸脇滿之屬氣不同。太陽風傷衛不
解。渴而小便不利。邪熱犯本。五苓散。太陽寒傷營失汗。熱結
膀胱如狂。小便自利。小腹急滿結痛。桃核承氣湯。尺中遲
弦。少腹濡滿。痛不可按。小便反利。亦有難澹者。爲畜血。代抵
當湯。太陰身黃脈沉。小腹滿。小便不利。茵陳蒿湯。陽明
府實。小便短赤。大便秘結。小腹鞭滿。大承氣湯。陰證初起。
自覺小腹滿。腰腹痛。手足厥冷者。真武湯。若冷結膀胱。關
元。而陽氣不化。小便不通者。不可誤認澹閉。而與利水藥。宜
先灸本穴。然後溫補。若灸後手足不溫者。不治。又有陰陽
易病。小腹滿引腰膀。小便不利者。逍遙湯下。燒裨散。病人
素有痞氣。連在臍旁。痛引入陰筋者。名藏結。難治。四逆湯加
吳茱萸肉桂。

讖語

經曰。邪氣盛則實。精氣奪則虛。故實則讖語。虛則鄭聲。傷寒
胃中熱甚。上乘於心。心爲熱胃。則神識昏迷。妄有所見而言。
輕者睡中呢喃。重者不睡亦語。有讖語者。合日自言。日用
常行之事。是熱未至於甚也。獨語者。如見鬼狀。若劇者。發則
不識人。語言不休者。又其甚也。言亂者。謂妄言罵詈。不避親
疎。神明已亂也。狂言者。大開目與人言。所未嘗見之事。此邪
熱之最劇者。凡此見其熱之輕重也。脈來沉實。或數盛。有
力。二便秘澹。燥渴讖語狂妄。腹脹滿。潮熱自汗。或下利純清
水。或心腹鞭痛。或過經不解。皆當下。若下後熱不止。或喘滿
氣逆而上奔。或泄利氣脫而下奪。皆逆也。大抵熱入於胃。
水涸燥結。必發讖語。皆爲實。有被火劫取汗。而讖語者。有亡

陽識語者。此爲虛也。發汗多。亡陽識語。身自和。不可下。柴
胡桂枝湯和之。火迫識語者。津液內竭。火熱侵耗所致也。
桂枝甘草龍骨牡蠣湯。得病無熱。但狂言煩躁不安。精采
不與人相當。此熱結在膀胱。五苓散水調探吐之。或加知母
甘草。各桂苓飲。得病無頭痛。不惡寒。但身熱發渴。小便利。
大便黑。口出無倫語。此熱在心脾。當歸活血湯。當汗失汗
識語。善忘。善飢。漱水。身黃。腹滿如狂者。屬瘀血也。桃核承氣
湯。婦人熱入血室。夜則識語。如見鬼狀。小柴胡加當歸丹
皮。三陽合病。識語面垢遺尿。白虎湯。大熱乾嘔。呻吟錯
語。不得眠。黃連解毒湯。溫熱病及時疫。誤用表藥。熱傳三
焦。識語悶亂者。三黃石膏加大黃下之。凡識語無實熱燥
結可攻者。皆不可治。下後識妄雖稍緩。仍不止。若未見溏糞

者。爲下未盡。更下之。○諸如此者。脉短則死。脉自和則愈。又身微熱。脉浮大者生。逆冷直視。脉沉細者死。

石頑治陳仲吾勞力感寒。其人年齒雖高。而形體豐盛。飲噉兼人。濕熱素盛。初冬患發熱。胸腹脹滿。甫四日。而舌胎焦黑芒刺。痰喘聲嘶。讖語誦誦不休。手足動擲不寧。時發呃一二聲。二便悶澀。脉洪滑搏指。右倍於左。此濕熱挾邪鬱發。下證之最急者。遂疏大承氣入鐵漿竹瀝薑汁與之。諸醫咸謂日數未久。不可便下。殊不知濕熱上逆。勢若洪水泛濫。稍遲則脹透膈膜。神丹莫濟矣。彼至厥中有善醫者。深以余言爲然。急令煎服。連下粘垢二次。熱與讖語稍止。更服小陷胸至四五劑。神識始清。糜粥倍進。半月後。頻索醇酒。恣噉新橘。致痰濕復聚。仍痞悶讖妄發熱。或欲再

進前方。取決於余。診之則人迎小弱而氣口虛大。按之卽無安有復下之理。况仲景識語例中。亡陽火逆。皆爲虛證。此屬少陽生氣衰微。痰涎沃膽之候。遂與柴胡龍骨牡蠣湯一劑而安。繼詢善後之策。惟香砂六君理脾運痰爲第一義。惜乎龐見雜出。終磨一簣之功耳。

鄭聲

鄭聲者。謂虛而聲轉無力。不相接續。造字出於喉中。若鄭聲之輕怯也。又重語疊出。說過又說。亦謂鄭聲。蓋因汗下後失其正音。精氣衰奪之候。其脉弦細而微。身有微熱。或寒熱或嘔逆。大小便自利而鄭聲者。小柴胡湯。脉雖微弱而和。手足溫者。生脉散。人參三白湯。氣息短促。而脉沉細欲絕。附子湯倍參。若上氣喘促。或呃逆不止。神昏不省人事者。

死。

發狂

內經云。邪入於陽則狂。邪入於陰則瘖。傷寒熱毒在胃。併於心。使神不寧。遂發狂也。○發狂雖主胃府實熱。亦有屬經證者。如病人不欲食。小便自利。大便自調。脈來緊盛。骨節煩疼。翕然如有熱狀。奄然發狂。濺然汗出而解。此陽明經熱。欲作汗而狂也。不必用藥。宜類與薑湯助其作汗自解。○病人熱甚。脈來數實。欲登高棄衣。狂妄罵詈。不避親疎。蓋陽盛則四肢實。實則能登高也。大承氣湯。○頭痛不解。熱結膀胱。其人如狂。而血自下者愈。外已解。但少腹急結。脈沉身黃。脣焦漱水。小便自利者。此為畜血如狂。桃核承氣湯。○凡溫病熱病時疫熱毒內盛。脈大腹滿。便秘發狂者。並宜承氣合黃連解。

毒湯。若脉浮兼表證者。涼膈雙解。三黃石膏。或大承氣加薑棗。皆能發汗解表也。凡溫熱時行。發狂得汗者生。不得汗者死。脉小厥逆者不治。○有陽厥暴怒發狂者。蓋陽氣暴折。鬱而多怒則發狂也。大承氣加鐵落。○陰證煩躁如狂。渴欲飲水而不能嚥。或身熱戴陽。手足逆冷。脉沉細。或虛大無根。附子湯。火焰散。霹靂散。選用。○若陽狂直視。便溺自遺。與汗後大熱。脉躁狂言不食。皆不治。

發斑

夫熱則傷血。血熱不散。裏實表虛。熱氣乘虛。出於皮膚而爲斑。輕則如蚊跡。甚則如錦紋。或病本屬陽。誤投熱藥。或當汗不汗。當下不下。或汗下未解。或冬溫誤用麻黃助熱。或溫病誤用辛溫發表。皆能至此。慎不可發汗。重令開泄。更增斑爛。

亦不可輕下。以其熱毒散漫於外也。惟大便秘。躁渴色紫者。可微下之。凡汗下不解。足冷耳聾。胸中煩悶。欬嗽嘔逆。躁熱起卧不安。便是發斑之候。凡斑欲出未出之際。慎不可用寒涼攻熱。恐傷胃氣。必作嘔噦也。發斑皆失於汗下。熱毒內攻。不得外散。蘊於胃府而發出肌表。宜先與升麻黑參甘草煎服。甚則升麻湯加犀角黑參。若斑已出。不宜再行升發。始發又不宜便下。恐毒內陷也。若熱毒勢盛。咽痛心煩。狂言悶亂者。犀角黑參湯。咽痛可加牛旁子薄荷之類。若斑發已盡。外勢已退。內實不大便秘語。小劑涼膈散。或大柴胡微下之。溫熱病胃熱發斑。錯語神昏熱甚。而下證未全者。黃連解毒湯加犀角黑參。大便秘者。涼膈合五苓。去桂加滑石。未經下。而胃熱發斑者。白虎加人參湯。熱勢盛者。合解毒湯。

○時疫發斑。憎寒壯熱。頭疼骨節痛。拘急滿悶。初出尚有表證者。白虎湯。○溫毒發斑如錦紋者。犀角大青湯。脈虛熱甚。去苓葉升麻加入參生地柴胡。卽消斑。青黛飲。○陽毒發斑。狂言下利。咽痛面赤。斑如錦紋。陽毒升麻湯。脈虛熱甚。白虎加人參湯。脈洪大不知人者。三黃石膏湯。○內傷寒發斑者。此因暑月受涼。并傷冷物。內外皆寒。逼其暑火浮游於外而發斑也。其候寒熱間作。或鼻中微衄。脈來沉瀯。皮膚殊無大熱。斑亦無多。宜類與調中飲。若虛極自利。身熱爲必死證。用補中益氣湯。多有得生者。○陰證發斑者。狀如蚊迹蚤痕。手足多而胸脇少。頭面背上陽部殊無。其色淡紅。稍久則爲微黃。身雖有熱而安靜。脈來沉細。以其人元氣素虛。或先因慾事傷腎。或誤服涼藥太過。寒伏於下。逼其無根之火。聚於胸

中。薰灼肺胃。傳於皮膚而發。當用理中去。尤加附子。藿香。升麻。橘皮。甚則通脈四逆湯。然多不救。凡斑紅赤者。爲胃熱。紫者。爲胃傷。黑者。爲胃爛也。大抵鮮紅起發者。吉。雖大不妨。稠密成片紫色者。五死五生。雜色青黑者。十死不一生矣。凡斑既出。須得脈洪數有力。身溫足暖者。易治。若脈沉小足冷。元氣弱者。多難治。凡狂言發爽。大便自利。或短氣燥結不通。而黑斑。如果實。麤者。皆不可治。

許叔微治一人。內寒外熱而發斑。六脈沉細。肩背胸脇。斑出數點。隨出隨隱。旋更發出。語言狂亂。乃陽爲陰逼。上入於肺。轉之皮毛。故錯亂如狂。非譏語也。肌表雖熱。以手按之。須臾冷透如冰。與薑附等藥數服。後得大汗而愈。

滑伯仁治一人。身大熱。脈沉實而滑。四末微清。以燈燭之。

遍體皆赤斑。舌上胎黑而燥裂芒刺。神昏譫妄。以小柴胡加知母石膏。一夕連進三服。次用大承氣下之而安。呂滄洲治一人。脈虛自汗。誤與真武湯。遂至神昏。時時熟睡。脈伏不至。而肌熱灼指。此營熱致斑之候。非陽病陰脈之比。先與白虎。加人參湯化其斑。後以桃核承氣攻之而愈。

發黃

發黃者。陽明裏熱極甚。熱鬱留飲不散。濕熱相搏而成。大抵濕熱蒸太陰。脾土色見於外。必發黃也。經曰。濕熱交併。民多病痺。濕氣勝則如熏黃而晦。熱氣勝則如橘黃而明。傷寒發黃。熱勢已極。且與畜血相類。但小便不利。大便實而渴者。爲發黃。小便自利而不渴者。爲畜血也。凡白睛微黃而頭汗。及

環口汗出。便是發黃之候。凡小便利。大便黑。其人如狂。頭汗發渴。身黃如橘。爲瘀熱。但胸脇痛者。犀角地黃加大黃茵陳。小腹痛者。桃核承氣加茵陳。一身盡痛。發熱頭汗。口渴。小便不利。身如薰黃。爲濕熱。五苓散加茵陳。腹微滿者。茵陳蒿湯。太陽病失汗。一身盡痛。頭汗發熱而黃。麻黃連軹赤小豆湯。發熱小便不利而渴者。梔子檉皮湯。若肢體逆冷。嘔悶自利。胸中氣促。舌上胎滑。脈沉細而緊。此陰黃也。四逆加茵陳。有食更加枳朮橘半草豆蔻。下後發黃。爲脾土受傷。熱去而濕在也。理中湯加茵陳。若外有微熱者。五苓散。暑月汗閉發黃。五苓散用桂枝加茵陳香薷。溫毒時行發黃。茵陳蒿湯。發黃兼發斑者。茵陳蒿草龍膽犀角升麻等分煎服。名茵陳犀角湯。濕家一身盡痛。不能轉側。身黃脈

沉細而遲。四肢厥冷。怠惰少氣。爲寒濕。白朮附子湯。陰黃寸口近掌無脈。口鼻氣冷者死。形如烟薰。搖頭直視。環口黧黑。柔汗發黃。皆真藏氣絕也。

許叔微治一舟子。傷寒發黃。鼻內酸痛。身日如金。小便濇而大便如常。或欲用茵陳蒿湯。許曰。大便如常。則知病不在藏府。眼疼鼻酸痛。此病在清道。若用大黃。必腹脹爲逆。以瓜蒂散含水搐鼻中。黃水盡乃愈。

不大便

大便不通者。陽明內實也。因發汗利小便過多。致津液耗損。腸胃乾燥。而轉屬少陽。陽明者多矣。其人發渴。譫語。脈實狂妄。潮熱自汗。小便赤。或小腹硬。臍鞭痛。舌胎黃黑乾裂。並宜三承氣選用。凡欲攻之。當先與小承氣。服後轉失氣者。與大

承氣湯。○傷寒不大便六七日。頭痛有熱多汗。小便黃赤者。此裏熱蒸陽明。調胃承氣湯。小便清者。知邪熱不在裏。不可下。○陽明證具。而脈浮或發熱者。爲表未盡。小柴胡和之。○嘔多。雖有陽明證。不可下。○脈浮而惡寒者。雖不大便。猶帶表邪。未可便下。○大便難。小便少。不轉矢氣。攻之必初鞭後溏。俟結定。乃可攻之。○陽明脈浮多汗。小便利而大便難。爲津液內竭。下之必清穀脹滿。宜蜜煎導。○脾約大便難。麻仁丸。○陽結不大便。大柴胡下麻仁丸。○陰結不大便。四逆湯加薑汁白蜜下金液丹。○婦人血風崩漏。男子失血過多。內有燥熱。撮空閉目。錯語神昏。而不大便者。生地黃黃連湯加荆芥。脈實稍加酒大黃。○大病後津枯氣逆攻痛。大便不行。當歸三錢。生枳殼廣皮人參各一錢。入薑汁白蜜熱服。若血

虛至夜有熱。加二地。餘熱不盡。并溺赤。瀉加二冬。切不可用
潤腸麻仁等丸。凡不大便而脈虛瀉。循衣摸床。直視喘急。
爲真陰內竭。舌黑唇焦。齒根灰腐者。爲燥屎上衝。皆死候也。
石頑治國學助教顧九玉女。小產後。感冒客邪。或用散表
之藥。熱不止。大便數日不行。六脈結代。氣口尤甚。舌心灰
黑。而無積胎。心中動悸不寧。正合仲景灸甘草湯證例。遂
作本湯服之。二劑而更衣。熱除脈復矣。

自利

傷寒邪氣傳裏。裏虛挾熱。則自下利。當別其陰陽。三陽下利
皆身熱。太陰下利手足溫。少陰厥陰則身寒無熱。此大槩也。
夫自利清穀不渴。或渴不能飲。或喜熱飲。小便色白。厥冷惡
寒。脈來沉遲無力。或身反發熱。手足逆冷。皆直中陰寒自利。

也。若渴欲飲冷。溺色黃赤。自利黃水。及泄利下重臭穢。日晡發熱。脈來數實而滑。雖或厥逆而發熱。皆傳經挾熱下利也。蓋因風邪入胃。木來侮土。故令暴下。或溫或攻。或固下焦。或利小便。但不可發汗。汗之使邪內攻。必成腹滿耳。惟合病發熱自利。則爲表邪。不可例以爲裏證也。自利者。不因攻下而自泄利也。然有夾食夾水。表邪傳裏。合病伏氣。傍流陰寒之不同。又須辨其協寒協熱。協寒而利者。必爲驚瘧。協熱而利者。定爲腸垢也。如夾食證。過用消導裏藥。引邪內犯而泄利者。胃苓湯。有表證發熱飲水。水停心下。而喘欬自利者。小青龍加減。輕者五苓散加葶藶。有水停脇下。鞭痛。欬而自利者。十棗湯。脇下一片獨冷。加炮薑。虛寒者。少加桂附行之。有表邪傳裏。腸鳴腹痛。下利。脈沉。

遲者。小建中和之。有合病發熱。脉浮自利者。葛根湯。有冬溫發熱。咽痛自利。心煩。陽且湯。加桔梗茯苓。有溫病發熱而渴。小便赤澀。大便自利。脉浮者。五苓散去桂。加黃芩。脉沉。豬苓湯。溫熱內甚。而自利不止者。黃連解毒湯。少陰四逆。泄利下重。四逆散。下利讞語有燥屎。小承氣湯。傷寒十餘日。口燥舌乾。心中疼自利。清黃臭水。大承氣湯。急下之。凡食下卽化腐臭而出。是有火也。今火邪內燔。陰津耗竭。燥結如石。故傍流清黃臭水。與完穀不化之屬陰寒者不同。慎勿誤認陰寒而與溫藥。必死。凡始病不發熱。便腹痛嘔吐。爲陰寒自利。如太陰自利不渴而脉沉。理中湯。寒甚加附子。小便不利。合五苓散。少陰自利而渴。小便色白者。附子湯。小便不利。真武湯。自利厥逆。而反面赤戴陽。或下利清穀。

裏寒外熱。白通通脉選用。吐利厥逆。煩躁欲死者。吳茱萸湯。厥陰自利止。而煩躁發熱。陰盡復陽也。當自愈。

下利

下利者。不當下而便攻之。內虛協熱而泄也。有協熱壞證之不同。如太陽病未解而數下之。遂協熱而利。心下痞者。桂枝人參湯。太陽病下之早。遂利不止。脉促者。表未解也。葛根黃芩黃連湯。傷寒發熱。汗出不解。心下痞。嘔吐下利者。大柴胡湯。下利傍流清黃臭水者。大承氣湯。下利煩渴。飲水臍下熱甚下重。及誤用熱藥協熱利者。白頭翁湯。下利脉大腸鳴者。虛也。以其強下之故也。當歸四逆湯。汗下太過而畏寒厥逆。嘔吐不能食。泄利不止。脉來虛微乏力。當從陰證例治。溫熱毒邪內盛而利不止。黃連解毒湯。躁悶。

狂亂者。三黃石膏湯。下利差後。至其年月復發者。此猶寒留結也。備急丸。凡厥而下利。先厥後發熱者。利必自止。再厥必後利。下利脈大者為逆。脈緊者為未解。脈大者為未止。脈弱者為自愈。雖發熱不死。下利脈沉遲而少。赤身有微熱。下利清穀必鬱冒汗出而解。凡下利脈數而渴者。令自愈。設不差者。必便清血。以有熱故也。傷寒厥逆下利。當不能食。今反驟能食者。為除中也。脈不出者死。言胃氣竭絕而求助於食也。下利讞語而目直視。下利厥逆煩躁不得眠。下利發熱而自汗不止。下利止而頭眩。下利厥逆無脈。灸之不溫而脈不出。下利厥冷無脈。服通脈四逆湯。脈暴出而躁。與下利日數十行。脈反實者。皆為不治之證也。

便膿血

便血有陰陽冷熱之不同。若便膿血，則皆濕熱無疑。昔人有言：見血無寒。又言血熱妄行，則知下血屬熱者。十常八九。間有一二屬寒者。陽證內熱，則下鮮血。陰證內寒，則下瘀血。若紫黑成塊，或如豚肝，及下血水多者，皆難治也。陽證則脈數有力，爲實熱，可用苦寒藥治之。少陰病八九日，一身盡熱，以熱在膀胱，必便血也。冬月當喘，四逆湯。餘時黃芩湯。換赤芍加當歸。厥逆發熱，屢作不止，下膿血而脈數飲水者，白頭翁湯。若臍下熱而痛者，芍藥甘草湯。少陰溫熱病，下利膿血，煩渴不得卧，黃連阿膠湯。少陰傳經壞病，三、四日至四、五日，腹痛，小便不利，下利不止，便膿血者，桃花湯。陰證下血色瘀晦，或發呃者，附子理中湯。呃加丁香柿蒂。然多不救。凡下利膿血，脈宜虛小。若脈陰陽俱虛，熱不止，及脈

弦大而實。緊直如拔弓弦。弦細如循刀刃者。皆不可。

小便不利

邪氣聚於下焦。結而不散。則少腹鞭滿而痛。小便不通。若引飲過多。水飲停蓄。或下焦多熱。或中濕發黃。皆以利小便爲先。惟汗後亡津液。胃中乾。與陽明汗多者。則以利小便爲戒。若誤利之。重耗其陰。反致泉竭。多有涓滴不通而死者。可不慎歟。不但湯藥當禁。外熨亦當戒之。太陽表邪未盡。雖小便不利。發表藥中不可便加利水藥。誤用必致犯本。若脈浮煩渴飲水。小便不利者。爲入裏也。或身黃脈沉結。小腹鞭者。爲無血也。並宜五苓散。心煩懊懣發黃者。加茵陳。身黃腹滿。小便不利者。茵陳蒿湯。若表證盡除。而引飲小便不利者。此熱在下焦也。豬苓湯。若汗出多。不可與豬苓湯。宜竹葉

石膏湯。胸中鬱鬱微煩。懊憹不安。而小便不通者。此熱傷太陰肺氣不行。膀胱不化也。梔子豉湯。瀉吐之。熱病脈洪大。自汗出。舌燥飲水。小便不利者。白虎加人參湯。若大便乍難乍易。或下清黃臭水。小便黃赤不利者。此有燥屎也。調胃承氣湯。太陰腹痛自利。小便不利。腹滿脈實者。桂枝大黃湯。無熱脈沉者。理中湯。不効用五苓散。少陰虛寒腹痛自利。四肢疼重。小便或利或不利。或欬或喘或嘔。此爲有水氣。真武湯。熱傳少陰。四逆。或欬或悸。或小便不利。或腹中痛。或泄利下重者。此陽邪陷入陰經也。四逆散加茯苓。厥陰手足厥寒。脈細欲絕。小便不利。當歸四逆湯。凡小便不通。而見頭汗者。爲陽脫。此關格之疾也。不治。

小便難

小便難者。雖通而淋瀝赤澀爲陰虛陽湊。膀胱受熱也。凡小便不利而不至於不通者。勿妄利之。恐引邪入膀胱而變畜血也。汗下後腹滿小便難者。理中湯加厚朴茯苓。不應加附子。汗後舌乾微黃黑而無積胎。心煩動悸不寧。小便難。灸甘草湯。汗下太過而小便難。至夜煩躁者。當歸補血湯合生脈散。脈沉自利。四逆畏寒而小便難者。爲津液竭而氣化不行也。雖難必無黃赤澀痛。四逆湯合生脈散。凡小便不利。及澀數而難者。服清利膀胱藥不應。卽當清理肺氣。滋其化源。蓋肺氣窒塞則小便不行。肺中虛熱則小便難。若肺氣虛寒則小便清利倍常。試觀有肺者有尿。無肺者無尿。此理皎然矣。

許叔微治一人。太陽證因發汗不止。惡風小便澀。足攣急。

屈而不伸。脈浮而大。此證在仲景方中有兩條。大同小異。一則太陽病發汗。遂漏不止。惡風小便難。四肢微急。難以屈伸。一則傷寒脈浮。自汗出。心煩微惡寒。脚攣急。一屬漏風。小便難。一屬有汗小便數。病各不同。用藥少差。便有千里之失。與桂枝加附子湯。三啜而汗止。佐以芍藥甘草湯。足便得伸而愈。

小便自利

小便自利者。爲津液偏滲。有陰陽之不同。大瀉有四。一爲太陽表邪未入於裏。一爲大便鞭而水液旁達。一爲膀胱爲畜血所傷。不能約制水液。一爲下焦虛寒。津液下脫。太陽病發熱無汗。頭疼骨節痛。而二便如常者。麻黃湯。陽明府證微熱手足汗。小便雖利而必黃赤。承氣湯。凡小腹鞭滿。應

小便不利。今反自利。其人如狂者。此有畜血。以血爲陰邪。不能耗水。故也。抵當湯代抵當亦可。少陰病四逆。小便自利。而色白爲虛寒。四逆湯。或真武湯。去茯苓倍附子。既吐且利。小便復利。大汗出。下利清穀。裏寒外熱。脈欲絕者。通脈四逆湯。大抵小便利而色黃。大便不行者。爲裏實。若小便利而小腹痛。或善忘如狂者。爲瘀血。若小便利而身寒。自利脈沉微。其色清白。或反多者。皆屬陰寒也。

小便數

小便數者。腎虛而膀胱協熱。故水道頻數。而黃赤不長也。雖有自汗表證。不可服桂枝湯。得之便厥。爲其走津液也。傷寒脈浮。自汗出。小便數。心煩微惡寒。脚攣急。尺脈弱者。黃耆建中湯。不應。加生附子汁。製黃耆。尺中緊細而數者。勿用附

子。本方加人參赤茯苓素常失血者。更加牡丹皮。此味雖涼。不礙發散也。○脉浮濇。小便數而大便秘者。為脾約。麻仁丸。○小便數。大便鞭。不更衣十日無所苦。渴者。五苓散。

小便數。大便鞭。不更衣十日無所苦。渴者。五苓散。○小便數。大便鞭。不更衣十日無所苦。渴者。五苓散。○小便數。大便鞭。不更衣十日無所苦。渴者。五苓散。

小便數。大便鞭。不更衣十日無所苦。渴者。五苓散。○小便數。大便鞭。不更衣十日無所苦。渴者。五苓散。○小便數。大便鞭。不更衣十日無所苦。渴者。五苓散。

小便數。大便鞭。不更衣十日無所苦。渴者。五苓散。○小便數。大便鞭。不更衣十日無所苦。渴者。五苓散。○小便數。大便鞭。不更衣十日無所苦。渴者。五苓散。

嘔吐

嘔吐與乾嘔却異。嘔者。聲物俱出。火擊痰動也。吐者。無聲而但出物。濕痰無火也。蓋胃中有火則有聲。若但吐無聲。胃中陽虛可知。能無從事辛溫乎。然嘔甚於吐。其類有五。一爲邪傳少陽。一爲寒邪傷胃。一爲熱邪傳裏。一爲壞病胃虛。一爲陰寒內拒。故凡嘔吐清水。卽爲直中寒證。若胃中有熱。必見涎液酸水也。病機云。諸嘔吐酸。及水液渾濁。皆屬於熱。諸病水液澄澈清冷。皆屬於寒。此可見矣。始病便嘔吐飲食者。爲感寒食不化。宜於芎蘇香蘇正氣選用。嘔多。雖有陽明證不可下。爲其氣逆而未收斂爲實也。嘔吐雖出於胃。以表邪將欲傳裏。裏氣上衝。邪正分爭而然。屬少陽半表裏證。如心煩喜嘔。胸膈滿而嘔。往來寒熱而嘔。日晡發熱而嘔。或

已發汗。而煩滿。脉洪數者。總屬少陽。並宜小柴胡加減。○若微熱不止。腹痛不大便。鬱鬱微煩而嘔者。大柴胡下之。○若初病發熱頭痛。便見嘔逆自利。爲合病。以邪氣衝斥。循經熱入而傷動胃氣也。○食穀欲嘔者。屬陽明胃中虛也。吳茱萸湯得湯反劇者。屬上焦也。桂枝加厚朴杏仁湯。○汗下後。關上脉遲緩而吐。爲胃寒。理中湯。○屢經汗下。食入卽吐。乾薑黃芩黃連人參湯。○陰證嘔吐。膈上有寒。飲拒格也。太陰腹滿嘔逆食不下。或腹痛嘔吐。脉沉者。理中加橘半。寒甚加附子。○少陰脉沉遲。飲食入口卽吐。心下溫溫欲吐。復不能吐。自覺腹滿。而按之不韌。手足寒。自利。小便色白者。四逆湯加吳茱萸生薑。○大汗下後。惡寒厥逆。水藥不得入口。身痛自利。真武湯加半夏。下黑錫丹。與太陽病發汗後水逆之五苓

散證不同。凡溫病熱病嘔吐者。火性上炎也。無問表裏。通宜涼膈散。嘔吐煩渴者。白虎湯。濕溫嘔吐者。白虎合解毒。胃寒而嘔吐者。橘半藿香厚朴爲主。胃熱而嘔吐者。芩連葛根竹茹蘆根爲主。胃虛而嘔者。參朮苓半生薑糯米爲主。陰寒而嘔吐者。吳茱萸乾薑附子丁香爲主。凡嘔吐切不可用甘草大棗。皆當去之。惟胃虛者不在禁例。凡嘔家必用半夏生薑利水。下痰水去則嘔自止矣。故生薑爲嘔家聖藥。嘔家有癰膿者不可治。嘔膿盡自愈。此言胃脘癰也。夾食夾痰嘔吐。見總論本例中。

乾嘔

乾嘔者。寒鬱中脘。令陽氣蘊而不舒。欲吐而不能吐也。若有熱在內而嘔。則或出酸水。苦水。痰食矣。安有乾嘔之理哉。故

凡見乾嘔。卽爲寒證無疑。其太陽與少陽及水氣皆有乾嘔。如太陽乾嘔。則有頭痛發熱。少陽乾嘔。則有胸滿脇痛。水氣乾嘔。則有脇下引痛。若直中陰寒乾嘔。則外無一毫表證。必見下利清穀及諸寒證也。然太陽少陽水氣三者之乾嘔。皆不離乎寒也。傷寒表不解。乾嘔身熱微喘。或自利而欬。小青龍湯。汗出痞悶。脇下引痛。乾嘔短氣者。十棗湯。手足厥冷。乾嘔及噦而煩滿者。橘皮竹茹湯。太陰腹滿乾嘔。理中湯加橘皮半夏。少陰病下利。脉沉細乾嘔。乾薑附子湯。乾嘔而煩。厥逆無脉。白通加豬膽汁湯。裏寒外熱。脉微欲絕。乾嘔通脉四逆湯。膈上有寒飲乾嘔。四逆湯加吳茱萸。莫生薑。厥陰乾嘔吐涎沫頭痛。吳茱萸湯。溫病熱病時疫。乾嘔煩悶者。黃連解毒湯。凡乾嘔表證及水寒留飲。與

陰寒內拒。治各不同也。

腸鳴

邪氣內搏其飲。則爲腸鳴。雖有寒熱之不同。無不因積飲所致。下後身熱不除。心下痞鞭。腹中雷鳴下利者。瀉心湯選用。若腹痛便秘。熱劇當下者。小承氣加苓半木香薑汁。虛加人參。腹中寒氣雷鳴切痛。胸脇逆滿嘔吐者。附子粳米湯。

噦

噦者。其聲濁惡而長。有胃虛氣逆停飲。虛實寒熱死生之辨。凡傷寒邪未入府。或其人本虛。故攻其熱必噦。言胃虛不能食之人。誤用寒藥。或飲冷水所致。理中湯加丁附。渴而小便不利者。加桂苓。傷寒噦而腹滿。視其前後。知何部不利。利之則愈。此熱氣壅鬱。上下不通而噦也。有潮熱時時噦。

先與小柴胡湯加茯苓。後與大柴胡湯。嘔噦手足逆冷。橘皮半夏湯。若胸滿虛煩。橘皮竹茹湯。胃氣寒者。理中湯加吳茱萸。噦不止。橘皮半夏湯。或橘皮竹茹湯去竹茹加乾薑桂心通草。溫病熱未除。或重感暴寒。或內傷冷物而噦者。黃芩加半夏生薑湯加廣藿香葉橘皮。溫病有熱。飲水暴冷作噦。橘皮半夏湯。或半夏茯苓湯。並加蘆根茅根。熱病汗不出。大額發赤噦者死。凡腹滿不尿。脉散頭汗。目眩而噦者不治。凡噦而二便不通者。屬實熱。厥逆自利爲虛寒。兼嘔逆者爲停飲。設非此三種。則爲胃氣垂絕之候。多難治。若有疝瘕動氣。又當別論。不可忽也。

噫氣

噫氣者。胸中氣不交通也。靈樞曰。寒氣客於胃。厥逆從下上。

復出於胃則噫氣也。傷寒汗下後。心中痞悶。噫氣不除者。旋復代赭石湯。

石頑治郭孝望女。年十七。夏月因隣家失火受驚。遂發熱自利。嘔逆不食。或以傷寒治之。熱嘔愈甚。更以滾痰丸下瀉糞三次。而變目瞪不語。噫氣不絕。四肢逆冷。不能動移。諸醫咸謂壞證。議與承氣下之。而猶豫未決。邀余診之。六脈如絲。問之。知厥冷昏沉不語已三日矣。此陽氣欲脫之兆。本驚氣入心。而自汗發熱。驚則痰聚膈上。而嘔逆不食。夏月本無大寒。何得誤與發表攻裏。元氣大傷。致變此候。真似傷寒壞病耳。仲景云。傷寒發汗。若吐若下解後。心中痞悶。噫氣不除者。旋復代赭石湯主之。遂與此湯。連夜速煎。不時頻灌。至侵晨視之。喘息噫氣皆除。肢體溫和。周身

沾沾有微似之汗。目能移動。但口不能言。目不能開。而睛已微轉。其脉三倍於昨矣。改用六君子調理而安。

呃逆

呃逆者。氣上逆而爲吃噎也。或以爲欬逆者。誤也。按欬逆上氣爲欬。嗽氣逆非呃逆也。或以呃逆爲噦者。亦非也。噦者其聲濁惡而長。呃逆者纔發咽喉則遽止。呃呃然連續數聲而短促不長。有因胃熱失下。濁氣不得下降。逆上而作。脉必應指有力。證必內實。便閉口渴。此非真呃也。當下之大承氣湯。便軟者。生薑瀉心湯。胃虛有熱者。橘皮竹茹湯。胃中有痰飲而作。氣口脉必弦滑大於人迎。橘皮半夏湯。有因誤服寒涼。或飲冷水。水停心下。胃中虛冷而作。脉必結代。橘皮竹茹湯。去竹茹。加乾薑。桂心。通草。名橘皮乾薑湯。不應加丁香五六

粒。平素胃虛少食者。加薑汁炒焦白朮二三錢。或附子理中湯。此爲夾水勿疑。代脈爲死證也。若往來寒熱而呃者。是邪將入裏。裏不納邪。逆上衝激而然也。此屬少陽。以小柴胡和之。不應加黃連乾薑桂枝。若氣自臍下直衝於胸膈間。呃逆者。此爲肝腎虛寒之極。而挾陰火上衝。其脈必沉細。知不在胃也。病旣下虛。內已伏陰。或誤用寒涼。遂至令極於下。迫其相火上衝而爲呃逆。真氣欲盡也。輕則附子理中加柿蒂薑汁。重則四逆湯加丁沉。面赤者。急投羌活附子散。亦有得生者。病人煩躁。自覺甚熱。他人以手捫其肌膚則冷。此無根失守之火。散亂而爲熱。非實熱也。乃水極似火。陰極似陽之假熱。誤用涼藥。下咽則斃。急宜附子湯加薑桂丁沉。下黑錫丹。或羌活附子散溫之。呃逆漸止者可愈。服藥不効者。

難已。○畜血腹大青筋發呃者不必治呃。代抵當湯每服加人參一錢。藜附子五分。乾漆灰二分。或桃核承氣加參附乾漆灰更捷。此九死一生之候。非此不能奪也。凡久病而見呃逆者。此真氣已衰。不治。呃逆脉散舌短灰黑及頭汗不得尿與大便自利而腹滿者皆死。

欬嗽

諸欬悉屬於肺。故傷寒中風暴嗽皆爲表證。非虛勞久嗽裏證之有藏府傳次不同也。○傷寒欬嗽爲肺寒停飲。及邪傳半表半裏亦有陰寒內結者。如水與表邪相合而欬。則乾嘔發熱而悸。小青龍湯。○裏澀合水動肺而欬。則身涼脇下引痛。十棗湯。○水與裏寒相合而欬。則腹痛自利。四肢疼重。真武湯。○邪傳半表將入於裏而欬。則寒熱胸脇脹滿。小柴

胡去參加枳桔。陽邪傳裏而欬。則四逆泄利下重。四逆散加枳桔橘紅。有少陰發熱而欬。則脉沉無頭痛。麻黃附子細辛湯。有陰寒內結而欬。則自利腹痛。四逆湯加五味細辛。太陽陽明合病而欬。則身熱腹滿自利。葛根湯。陽明少陽合病而欬。則嘔而腹滿。小柴胡加葛根。凡外感風寒欬。發熱頭痛鼻流清涕者。必先發散為主。若寒鬱熱邪欬。嗽則痰唾如膠。金沸草散加減。熱邪傷肺而欬。必咽腭腫痛。萎蕤湯加減。溫病熱病欬。黃芩白虎。並加蘆根竹葉。若煩悶。則涼膈雙解選用。大抵外感欬。當以汗解。然又有不可汗者。經曰。欬而小便利及數。不可發汗。發汗則四肢厥逆。又欬而發汗。踈而苦滿者。並宜小建中為主。若脉散者。爲心火淫於肺金。鬼賊相刑。必死也。凡欬嗽與傷寒無預

者。詳見醫疇本門。

石頑治包山金孟珍。正月間忽欬吐清痰咽痛。五六日後大便下瘀晦血甚多。延至十餘日。請治於余。其脉六部皆沉弦而細。此水冷金寒之候也。遂與麻黃附子細辛湯。其血頓止。又與麻黃附子甘草湯。咽痛亦可。而覺心下動悸不寧。詢其受病之由。乃醉卧渴引冷飲所致。改用小青龍去麻黃加附子一劑。悸卽止。欬亦大減。但時吐清痰一二口。乃以桂酒製白芍入真武湯中與之。欬吐俱止。尚覺背微惡寒倦怠。更與附子湯二劑而安。

又治禮科姜如農長媳。患風熱喘欬無痰。灼熱自汗。而懷妊七月。先曾服和解清肺藥二十餘劑。其欬轉劇。而胎漸不安。余診之。六脉皆濡大無力。右手寸關獨盛而瀼。曰此

熱傷肺氣也。反與和解藥。逼令汗出。致肺氣益燥而欬逆愈甚。不得已復用苦寒折之。則火轉鬱伏而不散也。遂用大劑萎蕤及川芎杏仁白薇甘草。取萎蕤湯之半。更以當歸桔梗五味黃耆益氣生津。固肌斂肺。二劑汗止欬減。胎亦向安。更加生訶子皮四劑而痊。

又治郁金巖勞役後傷風。自汗胸滿痰結。欬出青黃涕。大如彈丸。此卽內經所謂勞風。法在肺下也。與茯苓桂枝白朮甘草湯加薑汁竹瀝二劑而安。

又治宋襄日女。素常多鬱。乾欬。春間感冒風邪。而欬逆愈甚。以小建中湯用蜜煎生薑。加蜜煎橘皮。外邪卽解而欬不止。次以逍遙散。仍用蜜煎薑橘。更與異攻散。用蜜製白朮薑橘而安。

又治里醫吳佩玉次女。傷風欬嗽。先前自用疎風潤肺止
嗽之藥不應。轉加嘔渴咽痛。求治于余。診之六脉浮滑。應
指作半夏散與之。三啜而病如失。或問欬嗽咽痛而渴。舉
世咸禁燥劑。而用半夏。輒勿何也。曰。用藥之權衡。非一言
而喻也。凡治病必求其本。此風邪挾飲上攻之暴嗽。故用
半夏桂枝以開通經絡。迅掃痰涎。兼甘艸之和脾胃。而致
津液。風痰散而營衛通。則咽痛燥渴自已。設泥其燥渴而
用清潤滋其痰濕。經絡愈壅。津液愈結。燥渴咽痛愈無寧
宇矣。不獨此也。近世治風寒欬嗽。雖用表藥。必兼桑皮黃
芩花粉。甚則知檠之類。少年得之。必種吐血虛損之根。中
年已後得之。多成痰火喘嗽之患。然此輩之妙用。在於預
爲地步。診時泛謂陰虛。防變不足之證。初時元氣未衰。服

之邪熱暫伏。似覺稍可。久之真氣漸傷。轉服轉甚。安慮其不成虛損耶。及見吐血。則不問何經府藏。屬火屬傷。血之散結。色之晦鮮。瘀之有無。槩以犀角地黃寒涼止截之劑投之。致血畜成根。向後或兩月一月一發。雖日服前藥不應矣。凡此之類。未遑枚舉。然必如是。則病家任之不疑。傍人目之爲神。斯所以聲名日著也。嘗見一人患項腫發熱。延傷寒家視之。則曰大頭傷寒。以表藥發之。并頭亦脹。確然大頭無疑矣。病家以其治之益甚。另延雜證家視之。則曰濕熱痰火。以裏藥攻之。則頭與項前左半皆消。但項後右側偏腫。則又確乎非大頭而爲雜證矣。病家又以腫在偏傍。疑爲癰毒。更延癰疽家治之。則曰對口偏疽。以托裏敷外藥治之。則氣血益滯。熱不得泄。鬱遏竟成潰瘍矣。本

一病也。治之迥異。證亦屢遷。可見其病隨藥變之不誣耳。
第未習所趨。非此不足以入時。何怪乎聖人性命之學。論
胥不返。遂至若是耶。

喘

形寒飲冷則傷肺。故氣上衝而喘也。有邪氣在表而喘。則心
腹濡而不堅。外證發熱。脉緊。身疼痛。冬月麻黃湯。餘時越脾
湯。邪氣外盛。壅遏清道。使氣不利而喘。雖經汗下。亦可發之。
○若惡風自汗。發熱而喘。桂枝湯加厚朴杏仁。○汗下後。汗
出無大熱而喘。麻黃杏仁甘草石膏湯。○誤下。脉促。汗出而
喘。葛根黃芩黃連湯。○發汗後。飲水多者。必喘。五苓散。○欬
而上氣。喉中水雞聲者。此水飲支塞肺道也。射干麻黃湯。○
有邪氣在裏而喘。必心腹脹滿。內實不大便。外證自汗短氣。

潮熱脈實。大承氣加厚朴杏仁。有水氣上衝而喘。必效。悸
乾嘔。小青龍湯。小腹痛。小便不利。去麻黃加茯苓。有水氣
內伏而喘。則效。引脇痛。十棗湯。凡陰證厥逆。脈沉細而喘。
促無汗者。可治。四逆湯加五味細辛。若發熱脈沉而喘。麻黃
附子細辛湯。凡喘慎不可用升麻。用之則愈喘。卽內傷勞
役氣虛發喘。當用補中益氣者。苟非清陽下陷。亦須煨葛根
代之。諸喘爲惡。故非輕也。華元化曰。盛則爲喘。言肺中邪
盛而腎虛也。所以陰證發喘。尤爲惡候。斲喪之人。腎氣上乘
而喘。急用腎氣丸。雜以黑錫丹。導火歸元。然多不救。加以動
息搖肩。戴眼直視。汗出厥逆者。立斃。大抵邪壅上盛。正氣欲
脫。必至喘滿。經曰。直視譫語喘滿者死。又身汗加油。喘而不
休者。爲命絕也。

短氣

短氣者似喘非喘。呼吸短促而不相續爲實。少氣不足以息。爲虛。當隨證治之。○表證不解。其人面色緣緣正赤。煩躁不安。不知痛處。而短氣脈濇者。桂枝二越婢一湯。○汗吐下後。元氣虛弱。脈微氣不相續者。大建中湯。○陰證脈沉遲細弱。手足厥逆。口鼻難以布息者。四逆加人參湯。○陽明病內實潮熱不大便。腹滿短氣者。三承氣選用。○渴欲飲水。水停心下。短氣妨悶者。茯苓甘草湯。○小便難者。五苓散。○乾嘔短氣痛引脇下者。十棗湯。○虛煩短氣。心中懊懣者。梔子豉湯。○短氣而胸腹脹滿。脈沉者。是氣滯。沉香降氣散。○大抵心腹脹滿。按之鞭痛而短氣者。爲裏實。若心腹濡而不滿。爲表邪。若少氣不足以息。脈微弱者。爲氣虛。此大法也。○溫熱病及

時疫多有短氣。但溫熱表證。則舌赤甚。時疫表證。則白胎如
屑。黃芩白虎達原飲爲主。若至胎黃及焦黑色。急用涼膈雙
解解毒承氣之類。無論溫熱時疫。皆可選用也。

氣逆

氣逆者。氣自腹中時逆上衝也。太陽病下之後。其氣上衝者。
此引邪內犯。而裏不服邪也。可與桂枝湯。方用前法。不上衝
者。此裏已受邪。不可與之。○病如桂枝證。頭不痛。項不强。寸
脈微浮。胸中痞鞅。氣上衝咽喉。不得息。此爲胸中實。瓜蒂散
吐之。○脈微者不可吐。吐之則心中逆滿。氣上衝胸。起則頭
眩。脈沉緊。發汗則動經。身爲振振搖。茯苓桂枝白朮甘草湯。
○厥陰氣上撞心。此寒熱錯雜之邪。烏梅丸黃連湯選用。
○病如虛羸少氣。氣逆上衝欲吐者。竹葉石膏湯。○有動氣誤

發汗。氣上衝而熱者。柴胡桂枝湯。二者皆正氣虛。而邪氣逆也。

渴

傷寒邪氣在表則無渴。邪氣傳裏則熱耗津液。是以能消水也。法曰。身熱為熱在表。引飲為熱在裏。故傷寒熱病本未身涼不渴。及小便不黃。脈不數者。未之有也。夫渴者熱傷津液於內。故欲引飲以助陰祛熱也。熱甚則能多飲。而旋飲旋渴。胃虛則但欲熱湯而畏寒飲。若陰盛虛陽上迫。而為假渴。則渴不能飲。或飲不能嚥。若強飲一二口。頃即吐也。溫病熱病。則一發即煩渴引飲。以伏氣自內變熱而發也。中暑則熱傷心包而熏肺。亦主煩渴。傷寒營衛俱傷。汗不得出。則煩躁而渴。邪犯膀胱及胃府。與夫三陰熱證。俱有煩渴。朱氏曰。

脈浮而渴。屬大陽。有汗而渴。屬陽明。自利而渴。屬少陰。至於厥陰消渴。飲水不止。則又熱之甚矣。○太陽表邪傷肺。水飲不散。乾嘔發熱。喘嗽而渴。小青龍去半夏加栝蒌根。○熱邪傳裏。則煩渴引飲。而脈數。小便不利。爲犯本。五苓散。○陽明經病。壯熱自汗。鼻乾目疼。煩渴自利。葛根湯。若府病內實。蒸蒸潮熱。燥渴飲水。大便閉者。三承氣選用。○少陽脈弦。口苦咽乾。發熱而渴。心煩喜嘔而渴。胸滿脇痛而渴。心下痞滿而渴。往來寒熱而渴。並宜小柴胡去半夏加栝蒌根。舌上胎白而渴。去半夏加葛根。乾燥。更加栝蒌根。表未解。腹滿便閉。用大柴胡湯。○凡先不渴。服發汗藥而渴。及先嘔後渴者。皆爲欲解。先渴後嘔。爲水停心下。此屬飲家。小半夏茯苓湯。兼眩悸嘔噦。赤茯苓湯。○凡發汗吐下後。口燥咽乾而渴。此津液

衰少。腎水不升。虛火上炎也。竹葉石膏湯。下利脈數而渴。飲不能多者。防團血。白頭翁湯。凡傳次陰經熱證。口燥咽乾。心下鞭痛。急下之。若直中陰經寒證。口不燥。咽不乾。而喉中自渴不能飲。脈沉者。急溫之。故少陰病。心煩自利而渴。脈沉小便色白者。此下焦虛寒。故飲水自救也。真武湯。若面赤煩躁。身反熱而口渴者。此陰盛格陽也。白通加豬膽汁湯。凡冬月發熱頭疼。二三日卽咽痛而渴。名曰冬溫。陽旦湯加萎蕤桔梗。溫病發熱而渴。黃芩湯加栝蒌根蘆根汁。若有暴感客邪。加葱白香豉。熱病渴欲飲水。口乾舌燥者。白虎湯。背微惡寒者。加人參。欬而嘔渴心煩。小便不利。豬苓湯。少陰溫熱病。二三日便口燥咽乾。大承氣湯。或裏熱燥甚。佛鬱燥煩。留飲不散。大渴不止。則腹滿高起。痛不可忍。但嘔。

冷涎。大渴不能飲。飲亦不能止其渴。喘急悶亂欲死。大承氣湯乘熱下咽。其渴立止。似無病人。須臾大汗而解。往往有利而汗出者。以邪隨汗之宣通。故不利而愈也。○時疫舌上白胎而渴。白虎湯。舌根漸黃至中心者。涼膈數解。甚則合解毒承氣下之。舌上胎黑而潤。渴不能飲者。必嘔血。犀角地黃湯加大黃。○熱病汗下後。煩渴欲飲水者。少少與之。是謂以法救之。渴不止。頻頻與之。切勿按摩中脘。恐成水結胸也。溫病熱病。煩渴不解。往往得水。或服黃芩石膏等寒藥。浹然汗出而解者。正爲腸胃燥熱不能祛散邪氣。忽然得凉水寒藥。助其胃氣祛邪。因得汗出而解。非傷寒發表不遠熱之謂也。東垣治一人。煩躁目赤而渴。脈七八至。按之不鼓。此陰盛格陽於外。非熱也。以薑附治之而安。

羅謙甫治一人。傷寒脈沉細而微。厥逆自利腹痛。目不欲開。兩手常抱腋下。昏卧口燥舌乾。四逆加入參葱白而愈。

漱水

漱水不欲嚥者。胸中無實熱也。如陽明身熱日疼。此熱在經。欲作衄也。犀角地黃湯去生地加甘草桂枝。若見表證鼻衄者。為熱傷經絡。迫血妄行。慎勿輕用犀角地黃湯。當詳衄血例治。若無表證。腹滿按之雖痛而濡。其人善忘如狂。小便自利。大便色黑。口燥但欲漱水不欲嚥者。為有瘀血結於下焦。輕則桃核承氣。當換肉桂重則抵當湯。如無蟲蛭以干漆灰代之下盡黑物乃愈。少陰病手足冷。時時煩。但欲漱水而不能飲。或勉強飲下。少頃復吐。或飲水而嘔。或臑逆者。皆屬內寒。四逆湯證也。厥陰下利無脈。乾嘔煩渴漱水者。白通加豬膽汁湯。厥陰

煩躁吐衄。口燥舌乾。時欲涼水浸舌。理中丸加烏梅。不時噉之。蓋無根失守之火。遊於咽嗑之間。假作燥渴。終不能飲也。或有能飲不吐者。此則熱耳。

衄血

衄血者。經絡熱盛。迫血妄行於清道也。經曰。以桂枝麻黃治衄。非治衄也。乃欲解散經中邪氣耳。太陽衄血。及服桂枝湯致衄者。爲欲解。若衄而成痰者。少刻自解。若點滴不成流者。此邪氣在經也。若脈浮緊。身疼痛。發熱無汗者。麻黃湯汗之。三時感冒衄者。香薷散加葱豉。或參蘇飲汗之。蓋邪熱在表。不得汗。迫血妄行。奪其汗。則血自止。若衄出不止。又當止血爲急。不可拘執也。若脈不浮緊。身無熱者。切不可發汗。陽明口乾鼻燥。漱水不能嚥。頭痛目睛暈黃。寸脈數盛者。必衄。

○衄血而渴欲飲水。水入卽吐者。先服五苓散。次用竹葉石膏湯。○誤發少陰汗。下厥上竭。口鼻耳目出血者難治。與當歸四逆湯。衄不止者死。止而頭眩者亦死。○衄家不可發汗。言陰血本虛也。黃耆建中。誤汗動血。加犀角。○傷寒衄血吐血不止。誤用犀角地黃等涼劑。致血留心胸之分而滿痛者。一味木香酒磨不時呷之。○冬溫溫病衄血。皆用黃芩湯加茅花。如無茅花。茅根汁代之。熱病時疫。通宜白虎湯加藕汁。茅根汁童便。○陽毒溫毒衄血。犀角地黃合三黃石膏湯。去麻黃加百草霜。○大抵衄血吐血。脈滑小者生。脈實大者死。○吐衄後。脈微弱者易治。若熱反盛。脈及數急者不治。○熱病欬而衄。汗不出。出不至足者死。○凡衄不止而頭汗出。身無汗。及發汗不至足者難治。○內傷勞役大衄。陰火乘虛驟

衄。及久衄不止等雜證。不在此例。

石頑治歙客黃姓者。正月間患傷寒。衄血甚多。必發於卯刻。數日不止。面上佛鬱。頭痛身微熱。脈浮大而數。按之則孔。意謂衄血既多。則熱邪當解。此獨不解者。先必邪氣在經。點滴之衄。誤服涼血止截藥所致。遂與越脾湯一劑。即大青龍湯太桂枝杏仁熱服得汗而解。但至夜則身有微熱。更與當歸補血湯四劑而安。

又治豐關張九弘之媳。頭痛如破。屢服發表之藥。轉劇。邀余診之。六脈數疾無倫。寸口大三倍於尺中。時大煩渴。飲不能多。白睛微黃而視歧。曰。此伏氣之發。誤用表藥。熱邪載火於上而欲衄也。以黃芩湯一劑投之。明晨果衄血如流。與芍藥甘草湯加茅花童便。不時溫服。至晚微顫而止。

吐血

吐血

衄血多有在經表邪。吐血皆屬傳經裏證。以當汗不汗。熱毒入內。迫血妄行。從胃脘而出也。凡見眼閉唇紅。神昏語短。眩冒迷妄。煩躁。漱水驚狂。讖語。背寒足冷。四肢厥逆。胸腹急滿。便黑溺頻。皆瘀血證也。不必悉具。但見一二證。便宜犀角地黃湯。然其性大寒。能凝滯瘀血。須諒證虛實寒熱。加減。虛者太地黃加阿膠。血餘炙甘草。童便。實者加酒大黃。茜根。穿山甲。寒者加炮薑。炙甘草。熱者加芩連。木香。陰虛火炎之血。則凝結如朱漆。獨參湯下六味丸。血虛而熱。雖赤不結。黃連阿膠湯。胃虛者。則不甚赤而散。四君子加廣皮。木香。太陽病。脈浮數。反灸之。必驚狂起卧不安。咽燥吐血。救逆湯。咽喉閉塞。不可發汗。發汗則吐血。黃耆建中湯。誤發少陰

汗動血者。當歸四通湯。○本虛損吐血人。復感寒嗽血。黃著建中湯。輕者只用桔梗湯加葱豉。○凡嘔吐血水多者。爲肝藏久傷。或胃敗所致。多不可治。○虛損內傷吐血本證。詳具醫端。

石頑治姜學。在夏月感冒欬嗽。時居母夫人喪。哀痛骨立。寢苦茹蔬。醫者不察虛實。妄投枳桔芩梔。不但鬱閉表邪。兼之傷犯中氣。遂致嘔血泄瀉。觀其外證。脣燥咽乾。頗似有熱。而脈弦小。知爲脾胃虛寒。客邪不散。虛火乘機僭發之候。遂與桂枝人參湯三劑。而血瀉皆除。調理脾肺而康。又治沈懋甫仲子。年十七。每傷風卽吐血夢泄。此肝藏有伏火。火動則招風也。蓋肝爲藏血藏魂之地。肝不藏則血隨火炎。魂不寧則精隨夢泄。遂與桂枝湯加龍骨牡蠣四

劑而表解血止。桂枝湯主和營散邪。加龍骨牡蠣以鎮肝安魂。封藏固則風不易入。魂夢安則火不妄動。而血亦不上湧。精亦不下泄矣。若以其火盛而用知葉之屬。鮮有下虛損者。

唾膿血

吐血雖主於火。然有虛實之殊。至唾膿血。無不因邪熱鬱發所致。經曰。服桂枝湯吐者。其後必唾膿血也。此非特酒客素多濕熱蘊積而然。每見春溫誤行汗下不解。多有此變。並宜葶藶苦酒湯下奪之。冬溫誤用辛甘發汗不解。復大下之。致胃氣虛寒。邪伏陰中。而見寸脈沉遲。尺脈不至。咽喉不利。唾膿血者。麻黃升麻湯萎蕤湯選用。或增損而用。石頑治陸中行室。年二十餘。臘月中旬。患欬。推過半月。

病勢稍減。新正五日復欬倍前。自汗體倦。咽喉乾痛。至元
夕忽微惡寒發熱。明日轉爲脹痛。自利。手足逆冷。咽痛異
常。又三日則欬唾膿血。始延余治。其脈輕取微數。尋之則
仍不數。寸口似動而輒。尺部畧重則無。審其脈證。寒熱難
分。頗似仲景厥陰例。中麻黃升麻湯證。蓋始本冬溫所傷
原不爲重。故欬至半月漸減。乃勉力支持歲事。過於勞役。
傷其脾肺之氣。故欬復甚於前。至望夜忽憎寒發熱。來日
遂自利。厥逆者。當是病中體疎。復感寒邪之故。熱邪旣傷
於內。寒邪復加於外。寒閉熱邪。不得外散。勢必內奔而爲
自利。致邪傳少陰。厥陰。而爲咽喉不利。唾膿血也。雖傷寒
大下後與傷熱後自利不同。而寒熱錯雜則一。遂與麻黃
升麻湯一劑。肢體微汗。手足溫暖。自利卽止。明日診之。脈

亦向和。嗣後與異功生脉合服數劑而安。

熱入血室

衝爲血海。卽爲血室。衝脉得熱。則逼血下行。男子亦有是證。不獨婦人也。凡血滯不行。則脉乍瀉乍數。或沉或伏。若血熱交併。則洪盛。血虛則乳。虛中有瘀。則乳中帶弦。此一定法也。如陽明證下血。譏語。此爲熱入血室。但頭汗出。當刺期門。隨其實而瀉之。濺然汗出。則愈。如欲用藥。小柴胡合犀角地黃。熱甚神昏者。生地黃黃連湯稍加酒。大黃微利之。以有瘀血。故頭汗也。婦人中風發熱。經水適來。七八日胸脇下滿。如結胸狀。譏語者。刺期門。此言適來卽斷。血結在裏爲實證。故刺期門以瀉之。不善刺者。以小柴胡去參。加桃仁丹皮。婦尾穿山甲以消之。婦人中風寒熱。經水適斷。血結如瘧。

狀者。此言經行未盡而適斷。雖有結血。未爲全實。小柴胡加當歸丹皮生地以涼之。婦人傷寒發熱。經水適來。晝日明了。暮則譫語。如見鬼狀者。此言經行不斷。則熱不留結。勿謂譫語而誤用硝黃犯其胃氣。刺動營血。犯其中焦。柴胡和解犯其上焦。但不妄犯熱。隨血散自愈也。血弱氣盡。邪正相搏。結於脇下。默默不欲食。邪高痛下而嘔者。小柴胡湯主之。

畜血

傷寒太陽病。當汗不汗。則熱瘀在裏。必血結也。大抵胸脇小腹鞭滿。以手按之痛。小便不利。乃氣滯不行而爲滯悶。若乾嘔欬引脇下痛者。爲水飲。五苓十棗證也。若小便自利。大便黑亮。其人如狂者。爲畜血。桃核承氣代抵當湯選用。已下脈數不解。消穀善飢。六七日不大便者。此有瘀血。抵當湯。

若產後感冒。或停食。瘀血不行。腹脹喘逆。此血化爲水也。下
瘀血湯。不應急加人參乾漆灰。○陽明病。其人善忘。大便黑。
胸中痛。不可近者。畜血也。犀角地黃湯加大黃。然瘡臑如漆
者。爲畜血。若黑燥如煤者。爲燥結。非畜血也。○畜血證。舌胎
有邊白中黑而極薄潤。必無乾燥焦黃者。以血屬陰。無大實
熱故也。○內傷雜證。畜血。不在此例。

戴同父治一人。元氣素虛。胃口有畜血。每食椒薑熱湯。則
呃一二聲。以人參生白朮各一兩切片。用蠶蟲醉死。絞漿
製爲末。入乾漆灰七分。以米飲丸。彈子大。早暮陳酒細嚼
一丸。終劑而愈。

喻嘉言治一人。傷寒後。兩脇僂廢。痛如刀刺。用桃核承氣
加熟附子肉桂而愈。

李士材治一人畜血如狂少腹結痛六脈乳而左關尺獨弦且其人素有羸證以桃核承氣加入參三錢而安

動氣

動氣者築築然跳動見於臍之上下左右也以其人脾氣素虛水結不散即發動氣狀如奔豚但動氣時聚時散奔豚則固結不散也又病人素有痞積亦為動氣皆不可汗下誤下則腹滿拘急身雖熱反欲踞卧無論左右上下通宜甘草乾薑湯加茯苓桂心或理中去朮加桂苓痛甚加吳茱萸附子以朮閉氣桂泄奔豚也○誤汗動氣則氣逆上衝或心中大煩日暈欲嘔引飲則吐或骨節痛通宜五苓散去朮倍桂枝茯苓或柴胡桂枝湯減參棗加苓橘緣參棗益氣苓橘散氣也○凡傷寒動氣必須審問非脈可知也

振

振者。森然若寒。聳然振動。皆貴爲虛寒也。振近於戰。而其勢稍輕。戰則鼓慄而戰。振則虛而不爭。但聳動耳。蓋由發汗吐下太過。致損血氣。虛極而作也。傷寒吐下後。逆氣衝胸。起則頭眩。身振振動。搖者。茯苓桂枝白朮甘草湯。太陽病。發汗不解。其人仍發熱。心下悸。頭眩。身瞤動。振振欲擗地者。真武湯。

戰慄

戰慄者。陰陽爭勝。故身爲之搖也。邪氣外與正氣爭則爲戰。邪氣內與正氣爭則爲慄。戰者。身戰寒聳。正氣勝。故得汗而解也。慄者。心慄鼓顛。而身不戰。陰氣盛。正虛不能勝邪。遂成寒逆也。有傳經戰慄。脈實便秘者。大柴胡湯。溫病發戰。

涼膈承氣加薑棗下之。必大汗而解。熱病發戰。白虎合解。毒有裏證者。涼膈雙解下之。傷寒夾冷食而內慄。寒逆不得解者。甘草乾薑湯。表邪勢盛而戰。五積散。陽虛不能作汗而慄。再造散。始病無熱而慄。手足逆冷者。理中湯。背惡寒者。附子湯。誤發其汗而慄。四逆湯加入參。壞證寒慄。正氣虛極也。十全大補人參養營大建中湯選用。傷寒六七日或十餘日。戰汗不當用藥。大法血隧熱。須用硝黃。氣隧寒滯。必用桂附。陰陽之用不同。有形無形故也。

肉瞶筋惕

肉瞶筋惕。非常常有之。經曰。陽氣者。精則養神。柔則養筋。發汗過多。津液涸少。陽氣偏枯。筋肉失其所養。如魚失水。故惕惕然動。瞶瞶然跳也。發汗過多。厥逆筋惕肉瞶者。真武湯。

若惡寒去。芍藥增。附子。惡熱減。附子倍。芍藥。素有動氣。誤行發汗。筋肉振跳者。理中湯加桂附茯苓。○素常失血之人。經脈失養。時時筋惕者。大劑溫補自愈。○若不因汗下。始病便見此證者。必元氣久虛。或失血房勞後。及新產感冒。致有是證。若誤用表藥。必無生理。

瘈瘲

瘈者。筋脈急而縮也。瘲者。筋脈緩而伸也。此證多屬虛風。蓋風主動搖。故爾。傷寒汗下後。傳變此證。病勢已劇。能用去風滌熱之劑治之。間有生者。大率與過汗經虛發瘈不殊。古人悉從小續命加減。殊不知壞病變見此候。皆是脾虛生風之象。雖有六經形證。斷不可復用表藥。惟大建中加減為當。有熱去桂附茯苓加芩連蠅稍之類。○風溫被火。微黃煩驚。時

發瘈瘲者。萎蕤湯加減。若瘈瘲戴眼反折。汗出如珠。爲太陽絕。又四肢縶習。動而不止。似瘈瘲而無力抽搐者。爲肝絕也。

怫鬱

怫鬱者。乃陽氣蒸越於頭面。聚而不散。故緣緣而赤也。所謂緣緣者。有時不赤。有時忽赤。若有所因而愧赧之狀也。傷寒發汗不徹。或覆蓋不周。或早揭衣被。致陽氣怫鬱在表。面色緣緣正赤。躁煩不知痛處。桂枝二越脾一湯。若腹滿潮熱。脈洪大而數者。因大便不通。火氣炎上而作赤色。大柴胡湯。汗吐下後。胃中虛冷。外氣怫鬱而畏寒。厥逆脈微者。理中湯。外有微熱。加桂枝。內寒甚者。加附子。溫病面赤。煩躁飲水。小柴胡去半夏加栝蘆根。熱病煩渴。引水面赤。白虎

加人參湯內實潮熱不大便。涼膈雙解選用。下後熱不解。或解半日許。復熱面赤者。黃連解毒人參白虎選用。若下元虛人。誤下傷陰。陽氣發越。而身熱目陷。手足逆冷。面合赤色者。不治。

戴陽

戴陽者。面赤如微酣之狀。陰證冷極發躁。面赤脉沉細。爲浮火上衝。水極似火也。凡下元虛憊之人。陽浮於上。與在表之邪相合。則爲戴陽。陽已戴於頭面。而不知者。更行表散。則孤陽飛越。危殆立至矣。節庵立法甚妙。以人參附子等藥。收拾陽氣歸於下元。而加葱白透表以散外邪也。至於傷風誤用麻黃重劑發汗。亦有戴陽煩躁者。與傷寒無異。總由平素下虛。是以真陽易於上越耳。下利清穀。脉沉遲。面少赤。白通

加豬膽汁湯。下利清穀。裏寒外熱。脈微欲絕。面赤咽痛者。通脈四逆湯加蔥白。○夏秋伏暑。面戴陽。上熱下寒。腹痛瀉利者。冷香飲子。若喘汗喘瀉者。非漿水散下來復丹不効。○大抵陽邪在表之拂鬱。必面合赤色。而手足自溫。若陰證虛陽上泛而戴陽。面雖赤。足脛必冷。不可但見面赤。便以爲熱也。

四逆

四逆者。手足逆冷。四肢溫也。厥逆者。四肢有時自溫。有時冰冷也。然自熱而至逆。逆而至厥。皆傳經之邪也。○少陰病四逆。或欬或悸。或小便不利。或腹中滿痛。或泄利下重者。四逆散。若手足厥冷。大便秘。小便赤。脈沉而滑。小承氣湯。○若初病便厥冷。四逆而脈沉者。當從陰寒例治。○又始本陽證發

熱因誤服寒涼過多。或汗下太過。致變四逆者。當從壞證例治。

石頑治金魯公。觸熱勞形。醉飽不謹。後受涼。遂患發熱。頭痛。脹滿喘逆。大汗如蒸。面赤戴陽。足冷陽縮。脈弦數無力。曰。此傷暑夾食而復夾陰也。與大順散一服。不應。轉覺腹急不安。因與枳實理中加厚朴大黃。是夜便更衣二次。身涼足暖而痊。

足冷

足冷手不冷者。下焦衛氣不溫也。外感而夾寒。食傷於七。身熱足冷。或頭痛。或腹痛。此胃中陽氣不得下通也。甘草煎薑理中五積選用。甚至有臍下結痛不可按。及下白膿者。此燥屎內結。大腸液傷而下也。改用消導利氣藥一劑。後與調

理。○有下元素虛之人。病傷寒中風惡寒發熱。但陽縮足冷者。當從夾陰例治。○盛暑中身熱足冷多汗者。作濕溫治之。

厥

厥者。逆冷之極。周身氣逆。手足厥冷是也。蓋諸陽起於四肢。厥為陽氣鬱伏可知。○厥逆雖有寒熱不同。無論傳經直中。俱屬陰經。皆不可發汗。少陰證。但厥無汗而強發之。必動血。○傷寒陰陽二厥。最宜審辨。夫陽厥者。先是三陽經感寒。起於頭痛發熱惡寒。已後傳進三陰血分。變出四肢厥冷。乍溫大便燥實。讖語發渴。揚手擲足。不惡寒。但惡熱。脈來沉滑而數。重按有力。此皆傳經熱厥。外證雖厥冷。內則熱極耳。蓋因大便失下。血氣不通。故手足乍冷乍溫。脣與爪甲青紫。此熱極反兼水化之義。大柴小承四逆散選用。○若濕病熱病時

疫。熱極而厥者。涼膈合解毒。或合承氣下之。熱不退者再下之。雖云三下熱不退者死。然亦有下三五次。利一二十行。熱方退而得生者。○熱病厥逆。手足冷。脈滑者。裏有熱也。白虎湯。○肢體厥冷。惟心胸有熱。大便秘者。解毒涼膈最當。○熱病厥逆不大便。而腹滿背微惡寒。脈浮滑者。白虎湯。沉滑者。承氣湯。此溫熱厥逆治法。不可拘於傷寒陽厥而禁大下也。○陰厥者。三陰經受寒。初起無身熱。頭疼。便惡寒。四肢厥冷。直過肘膝不溫。脣與爪甲青黑。欲引衣。踈卧。二便清利不渴。或腹痛泄利清穀。或凜慄面如刀刮。或口吐涎沫。或乾嘔呃逆。脈來沉細無力。此直中陰經寒厥。理中四逆附子湯選用。○若陰極似陽。格其虛陽於外。厥逆煩躁。面赤戴陽。虛陽上膈。則渴欲飲水而不能嚥。脈來數疾無倫。按之全無。此爲虛

陽發露。通宜白通脈四逆溫之。○又傷寒壞病。多有厥逆
煩躁者。不獨陰極也。當分陰傷陽傷用藥。最爲切要。陰傷則
宜滋補。先天真陰。兼清血中之熱。陽傷則宜溫養。後天胃氣。
兼助下焦真陽。貴在臨證活法。不得如陰厥陽厥例治也。○
痰厥手足逆冷。脈乍緊。心下滿而煩。飢不能食。瓜蒂散吐之。
○食厥手足逆冷。上部有脈。下部無脈。急作法探吐之。○傷
寒厥而心下悸者。當先治水。茯苓甘草湯。後治厥。小柴胡湯。
○吐利厥逆。煩躁欲死者。吳茱萸湯。○少陰脈不至。厥冷昏
沉如死人狀者。各曰屍厥。宜從陰毒治之。○厥逆下利。反驟
能食而脈不至。或散疾無倫者。爲除中不治。○凡厥逆惡寒
踈臥。煩躁下利。不知人者。皆惡候也。藏厥虵厥治例。另具本
條。

蹇臥

蹇臥者。身蹇而手足不伸也。凡人冬月獨寢則蹇曲不伸。天氣稍暖則手足舒暢。安有蹇臥之理。故一見蹇臥。即屬陰寒可知。然太陽經表邪未化為熱。及發熱之初。惡寒未罷。亦有蹇臥者。故凡見頭痛發熱諸陽證。即為太陽無疑。

脣甲青

色之青者為寒。赤者為熱。以寒中於裏。則血脉凝滯。不能榮行於外。所以脣爪青黑也。若熱毒流入於裏而為熱厥。則脣甲亦青。但青中必帶深紫。與陰寒之青黑不同。試觀產婦以舌青驗子死。脣青驗母死。則知青黑為陽氣竭絕。不得與青紫渾稱也。

咽喉乾痛